

新刊權載之文集

權載之女集卷第四十六

唐權德輿字載之

表狀

恩賜馬一疋并鞍轡及告身衣兩副等

右今日中使景忠信至伏奉恩旨賜臣前件馬并鞍轡  
告身衣服等寵賚所及遑荷難勝臣自受命已來神爽  
飛越晦明之際寢食靡遑恩私特加榮錫備至命書煥  
輝渥澤殊常出衣服於御府輟華駟於天廄負乘之懼  
不稱之災慶賜有溢目之榮獎任有提耳之誠以臣愚  
陋負荷難勝雖欲殺身豈酬鴻造無任感恩惶恐荷戴

之至謹奉狀陳謝以聞謹奏元和五年九月三十日

謝批荅表

臣德輿言昨日中使劉履謙至伏奉聖恩批荅令臣卽  
斷章表者臣以庸薄無他材能先朝駢策謬掌文誥因  
緣荏苒累踐班榮每自循省常憂顛覆至於經理代務  
非所克堪伏以陛下推擇宰司萬方觀聽謀猷化本宜  
得全才此臣所以尤不自安披瀝肝膽冀狗由衷之請  
不傷則哲之明鴻私猥加愚懇靡遂雖盡忠極慮不敢  
愛身而辱滯顛蒙難逃其責伏讀詔命焚灼在懷誓心  
畢命難酬萬一無任感恩荷戴戰懼之至謹奉表陳謝

以聞臣德輿誠惶誠恐頓首頓首謹言元和五年十一月一日

謝權知門下省過官狀

某官臣權德輿

右臣奉恩命權知門下省過官者伏以過官至重事在黃樞閱邠吏之否臧布百職於中外苟或非當其傷實多臣自玷台司忽及半載一昨陳乞天睠未迴當憂惕之中而寵榮薦至摩頂至踵豈酬鴻私無任感恩荷戴之至謹奉狀陳謝以聞謹奏元和六年二月十五日

請祔廟狀

臣亡父先臣秘書省著作郎贈太子少傅某

右臣先臣在元宗廟筮仕河朔忠孝名節冠於當時至德  
乾元之間歷監察御史起居舍人著作郎在代宗廟早  
違聖代臣幼丁荼蓼不及義方過蒙渥恩祿秩崇厚按  
開元禮文合立私廟三室永懷怵惕思展吉蠲已於通  
濟坊修建擇用二月二日祔饗臣位忝台司時逢孝理  
事循彝典禮展私誠感戴恩榮不敢不奏聞伏聽勅旨  
元和七年正月二十五日

謝追贈表

臣德輿言伏奉今日恩制臣亡父贈太子少傅先臣某

追贈太子太保寵靈所及徽數特加捧承命書感奉酸  
咽臣誠惶誠荷頓首頓首伏以先臣在天寶末年筮仕  
幽朔艱貞特立忠孝兩全名節冠於今古風聲激乎天  
下以執憲載筆逮事肅宗稟命不融早違昭代臣鄙亂  
之歲孤苦零丁遭逢昌運漸履名級過叨磨獎忽至台  
司無能受祿莫與臣比以先臣之名器未稱餘慶或鍾  
蒙陛下之寵秩逾涯此生何幸所建家廟實稽國章時  
及春祠禮從祔饗豈謂聖慈曲被孝思是崇當啟匱題  
主之時有告第滂泉之命感深霜露禮盛蒸嘗自菜流  
根實荷非常之澤摩頂至踵難酬不次之恩昭明交感

山嶽非重無任祇荷隕越之至謹奉表陳謝以聞臣某  
誠惶誠荷頓首頓首謹言元和七年二月一日

進詩狀

舊詩五十首

右宰臣奉宣進止令臣進舊詩者伏惟陛下以聖德文  
明化成天下徵詩之旨本在樞衡念舊之仁因及簪履  
臣頃尸重任久曠官常今列大僚猶叨寵渥於孔門非  
賜也言詩之目在漢庭異匡氏說詩之工徒積繁蕪豈  
近聲律自承休命伏用兢惶待罪之時無補公餽免退  
之後猶獻雕蟲旣乖法言有黷聰聽震悚怵惕不知所

安謹錄前件詩五十首奉進無任慚恩隕越之至謹奏  
元和八年六月十三日

謝借飛龍馬狀

蒙恩借飛龍馬三匹

右今月十日中使張少嗣至長樂驛奉宣進止借臣前  
件馬送出府界者臣以庸薄謬叨恩私寵榮沓至感戴  
難處以今月十五日至東驛出京兆府界天闕儲胥仰  
瞻日遠御閑蹀躞假借恩深仰元澤以難酬顧微生而  
何幸况代勞比君子之德負乘積小人之憂感戀明庭  
涕泗橫集當君陳之寄必竭肺肝美駿裏之迴恨無羽



翼無任感荷戀慕之至謹奉狀陳謝以聞謹奏元和八年七月十日

留守謝上表

臣某言伏奉今月三日制命授臣檢校吏部尚書兼御史大夫充東都留守判東都尚書省事以今月二十四日至東都上訖榮渥特加寵光備至俯仰印綬慙慙交懷

中謝

臣才不出衆祿期代耕因緣文字進越各級自聖明臨馭特沐鴻私歷五曹之貳居九卿之長遂叨大任忽涉四年智慮孱愚言詞朴訥徒淹歲月莫展涓埃雖竭匪躬之誠竟乖陳力之効自免樞務猶忝春官纔

經半載復授今任前後所歷皆不因人無非睿獎以至崇大况居守所寄東夏式瞻在君陳畢公之選兼天官憲府之重面辭之日親奉聖謨式過匪人整訓戎事用制竊發必資兼材豈臣懦弱所宜負荷今兵力至微武備不足此皆天鑒所察臣不敢累黷聰明杜其姦情亦在早計必與磨礪鉛鈍罄竭肝心忠以事君死而後已違離宸睭感戀闕庭以陛下注意之恩誓微臣捐軀之節無任荷戴屏營之至謹差押衙試殿中監成黨奉表以聞臣某誠惶誠恐頓首頓首謹言元和八年七月二十四日

太常博士舉人自代狀

將仕郎守太常博士臣權德輿

准制舉自代官浙江東道義勝軍副使殿中侍御史內供奉賜緋魚袋陸叅

右伏准建中元年正月五日制常叅官上後三日舉一人以自代者前件官操履淳固識度清明學通典憲文稽雅頌損益儀制實嘗其才謹具名如前謹奏貞元八年正月十七日太常博士臣權德輿狀進

右補闕舉人自代狀

將仕郎守右補闕臣權德輿

准制舉自代官將仕郎守太常博士賜緋魚袋鄭偕  
右伏准建中元年正月五日制常叅官上後三日舉一人  
以自代者前件官文藝敏達行義貞循直道正詞確然  
有立使之司諫才實過臣謹具名如前謹錄奏聞謹奏  
貞元八年六月二十八日右補闕臣權德輿狀進

起居舍人舉人自代狀

徵事郎守起居舍人臣權德輿

准制舉自代官朝議郎行右補闕歸登

右伏准建中元年正月五日制常叅官上後三日舉一  
人以自代者前件官詞學精實晦而不耀操尚純素貞

而有恒司諫十年其道一貫凡所踐履臣頗諸知使之  
記言庶禪法教謹具名如前謹奏貞元十年五月一日  
起居舍人臣權德輿狀進

起居舍人舉人自代狀

徵事郎守起居舍人知制誥臣權德輿

准制舉自代官儒林郎守尚書膳部員外郎賜緋魚袋  
楊於陵

右伏准建中元年正月五日制常叅官上後三日舉人  
以自代者前件官識理精通文藝典實行潔而敏氣和  
而專施於政事動有成績察其素履堪列近臣宏奉訓

辭庶能稱職謹具名如前謹錄奏聞謹奏貞元十年八月二十四日起居舍人知制誥臣權德輿狀奏

宣德郎守尚書駕部員外郎知制誥雲騎尉臣權德輿准制舉自代官朝散郎使持節開州諸軍事守開州刺史賜緋魚袋唐次

右伏惟建中元年正月五日制常叅官上後三日舉一人以自代者前件官文詞朗茂學識宏暢常任起居郎禮部員外郎出守四年日新其道司言草奏所任誠切酌於公議次有其才謹奏貞元十一年十一月二十四日駕部員外郎知制誥臣權德輿狀進

朝議郎守尚書司勳郎中知制誥雲騎尉賜緋魚袋臣  
權德輿准

制舉自代官朝議郎守尚書禮部郎中賜緋魚袋許孟  
容

右伏准建中元年正月五日制常叅官上後三日舉一  
人以自代者前件官有通識敏行強學懿文爲官擇人  
堪備清近發揮書命必有可觀謹具名如前謹錄奏聞  
謹奏貞元十四年四月四日司勳郎中知制誥臣權德  
輿狀進

朝議郎守中書舍人雲騎尉賜緋魚袋臣權德輿

准制舉自代官朝議郎守尚書司封郎中充集賢殿直  
書院學士判院事上騎都尉陳京

右伏准建中元年正月五日制常叅官上後三日舉一  
人以自代者前件官文學閎深資性真實厯博士補闕  
三爲郎官該達古今議論堅正掖垣之任望實所歸使  
之司言必能稱職謹錄奏聞謹奏

朝議郎守尚書禮部侍郎雲騎尉賜緋魚袋臣權德輿  
准制舉自代官朝議郎守中書舍人驍騎尉賜緋魚袋  
權知吏部選事楊於陵

右伏准建中元年正月五日制常叅官上後三日舉一

權載之文集

卷四六

八



人以自代者前件官文詞精雅器業端醇久踐職員多  
所練達求才誠重考藝尤難將辨妍媸必歸鑒裁使居  
其任尤尤至公謹具名如前謹奏

朝議郎守尚書戶部侍郎雲騎尉賜緋魚袋臣權德輿  
准制舉自代官湖南郡任團練觀察處置等使朝請大  
夫檢校右散騎常侍使持節都督潭州諸軍事兼潭州  
刺史御史中丞賜紫金魚袋楊憑

右伏准建中元年正月五日制常叅官上後三日舉一  
人以自代者前件官文學政事侃然自立器宏道直材  
茂識精累居中外克著聲實稽其志業可處大官司徒

貳左右邦教以臣忝據恐秦彘章涉明而投庶允公望  
謹錄奏聞謹奏

朝議大夫守尚書兵部侍郎驍騎尉成紀縣開國伯臣  
權德輿

准制舉自代官太中大夫守尚書禮部侍郎上輕車都  
尉清河縣開國男崔邠

右伏准建中元年正月五日制常叅官上後三日舉一  
人以自代者前件官敏識全才焯見理本久司綸翰乃  
擢禮闈凡所典領克揚聲績伏以夏官之貳務切簡稽  
國朝以來望實皆重其於選任頗異他曹以臣居之玷

辱爲甚掄才以授敢獻所知謹錄奏聞謹奏

朝散大夫守尚書吏部侍郎驍騎尉成紀縣開國伯權  
德輿

准制舉自代官朝請大夫守尚書刑部侍郎騎都尉高  
陽縣開國子許孟容

右伏准建中元年正月五日制常叅官上後三日舉一  
人以自代者前件官有文學行義堅明中正早登郎吏  
謹貫法程頃任給事中抗議不回德宗爲輟已行之詔  
自貳職司冠權領選曹強志在公克舉官業今銓衡務  
重朝選所難臣頃轉兵部纔經數月驟茲擢遷必速官

謗中臺之首尤在得人推於至公庶允羣議謹錄奏聞  
朝議大夫守太子賓客驍騎尉成紀縣開國伯臣權德  
輿

准制舉自代官諫議大夫韋况

右伏准建中元年正月五日制常參官上後三日舉一  
人以自代者前件官舍和抱素宴息道樞循性履方遠  
跡聲利徵拜諫列乞歸故山實有古風可司教本伏以  
賓護之任道德所宜不嬰事物時謂清重正職員於三  
品列商皓於四人豈臣小生忽據尊秩久於塵玷自速  
愆尤過蒙恩私猶處優禮俯仰慙灼上負聰明賦祿命

官必歸耆碩以臣負罪非所克堪推賢讓能朝有恒制  
大僚厚德慶洽時情謹錄奏聞謹奏

朝議大天守尚書兵部侍郎上柱國開國伯臣權德輿  
准制舉自代官朝議大夫守右散騎常侍上柱國宏農  
郡開國公賜紫金魚袋楊憑

右伏准建中元年正月五日制常叅官上後三日舉官  
一人以自代者前件官曠度偉才明試直道卓爾山立  
不隨波流自踐朝倫時推公器語言形於風槩聲猷發  
於事業庶政根本在於南官臣以庸虛五贊六〇〇〇〇  
望實未諧茲選物議時情共知不可輒量力以循分期

類能以審官庶允至公以明朝典謹錄奏聞謹奏

通議大夫守太常卿上柱國襄武縣開國侯賜紫金魚袋臣權德輿

准制舉自代官正議大夫尚書吏部侍郎上柱國清河縣開國子崔邈

右伏准建中元年正月五日制常參官上後三日舉一人以自代者前件官才茂識精密靜宏達久於右掖再履南宮儀曹取士聲實不惑小宰掄才流品皆叙伏以奉常典禮首冠羣卿古今盛選不可虛授以臣愚薄累奉恩榮前後職官無非忝濫逮今獎命尤懼非宜將何

以叶和神人祇肅郊祀跡邠公望當處大僚循分讓能  
朝有彛典謹錄奏聞謹奏

平章事舉人自代狀

某官某

右伏准建中元年正月五日制常參官上後三日舉一  
人以自代者羣官選任猶合讓能况台司寄重倍百常  
等臣自受恩以來夙夜惶怖必知敗覆無補盛明竊見  
前件官等含章履道忠孝諒直實有宰物之器皆有致  
君之誠足以上承睿謨下決庶政伏乞罷臣衰職以付  
材能則訐謨可行授受惟允羣情斯在非敢自私手疏

上陳伏惟鑒聽無任誠懇戰懼之至謹奉狀陳讓以聞  
謹奏

正議大夫守禮部尚書上柱國扶風郡開國公賜紫金  
魚袋臣權德輿

准制舉自代官正議大夫守太常卿上柱國清河縣開  
國子賜紫金魚袋崔邠

右件官器行端茂文學闊深自中書舍人歷禮部吏部  
二侍郎太常卿皆與臣交代諳其事政伏准建中元年  
正月五日制常叅官上後三日舉一人以自代者臣頃  
待罪非據首尾四年無補休明合當遺黜聖慈寬宥猶



守本官受恩之日惶駭失次又蒙特令宰臣奉宣進止  
獎飾慰喻至于再三謂臣更無罪過恐臣安有憂慙承  
命震灼感入肺肝宰司退免未有斯比實當怵惕之際  
再沐生成之恩臣以遣奉近侍不合申謝慮煩省覽不  
敢拜章輒因舉代之時特荷非常之澤况宗伯秩禮選  
任重難以邢代臣實允公望謹錄奏聞謹奏

東都留守銀青光祿大夫檢校吏部尚書兼御史大夫  
判東都尚書省事上柱國扶風郡開國公臣權德輿  
准制舉自代官朝議大夫守尚書戶部侍郎判度支護  
軍賜紫金魚袋盧坦

右伏准建中元年正月五日制內外官上後三日舉一人以自代者前件官端操敏用秉彛嚮方專席兩臺察廉三郡自理煩處劇再貳六官克茂休聲益彰直道保釐河洛從古重難宏修武備宜得威望揆才量力敢以薦言謹錄狀奏聞謹奏

賀除于頔太子賓客表

臣某言伏見今月二十二日制書以于頔爲太子賓客凡在過咎得以昭洗凡在臣僚不勝慶躍臣某

中謝伏

惟陛下推誠恤隱宥罪申恩澤深雨露明並日月于頔幸備公相又忝國恩而交私匪人行賄求進惡子兇悍

虐殺無辜降爲王傅使絕朝謁家居思過用愧其心在  
於聖恩已是私宥今則以其嘗居重任特降殊私進於  
賓護復得通籍載念循省洗其尤違懷生無不遂之人  
負罪有自新之路含養之澤與天同符山東諸侯未朝  
請者必欣戴恩仁浹洽肌骨此誠王者感人心之深若  
也臣嘗備樞近每承音旨衆情不至於膺慮已周古哲  
難行在聖姿則易寬明恤隱遐邇歡心仰戴天慈沐浴  
休運無任抃躍喜賀之至謹奉表陳賀以聞臣某誠歡  
誠賀頓首頓首謹言

謝停賜口臘表

臣某言伏奉今月十七日手詔以諸道每年合送口臘  
及尺既非厚賜未足申心以方鎮勞煩道路爲敝一例  
停罷貴適便宜以示臣省恩自九天澤周萬宇伏讀詔  
旨仰荷皇明臣某中謝臣聞務其大者捨其細存其廣  
者遺其狹故先師有寧儉之教禮經有必簡之文陛下  
誠切受人志於求瘼口臘香澤豈均雨露之濡尺寸度  
數曷比乾坤之大以道途勞費傳置將迎鑒在事先慮  
周物表去煩就省約已使人合簡易於二儀燭休明於  
四裔臣謬居分正獲奉德音抃賀之誠倍萬常品無任  
感戴悅懌之至謹奉表陳謝以聞臣某誠歡誠喜頓首

頓首謹言

謝端午賜衣及銀器百索等表

臣某言中使陳忠玠至伏准前月十七日手詔賜臣端午衣一副銀椀二銀砂羅一百索一軸并大將衣服等慶賜遠降天顏如臨恩光綢繆器服輝麗成周士吏居守輿師喜氣歡聲以感以抃臣某誠欣誠荷頓首頓首伏以斗杓建午之初日永星火之際陰陽肇接天地氣交陛下法象乾坤順行時令賀獻本臣子之志寵賚延君上之恩孱微無庸跼蹐斯甚佩長命之縷俾壽而臧捧在笥之衣旣安且吉然後大敷渥澤盡感鴻私願已

難酬此生何幸無任戴荷踴躍之至謹附中使陳忠玠  
謹奉表陳謝以聞臣某誠歡誠抃頓首頓首謹言

請置防禦軍狀

東都留守

今管舊防禦軍官健并陽翟偃師等縣鎮遇及留鎮將  
士共三千八百九十五人七百人舊防禦軍官健准元  
和三年八月十日勅量留一千五百七十人河陰陽翟  
偃師等縣鎮遇准元和三年五月二十五日勅留守牧  
管一千六百二十五人留鎮將士

右件見管兵士如前其中分在陽翟偃師外鎮并諸色

軍將所由及口僣等並在數內今在都城二千人已下  
極爲寡少臣去年七月五日面辭親奉聖旨欲却置防  
禦軍去年十月十六日又具狀聞奏至今未蒙進止東  
都與淮西地近又少陽丁憂未聞疾狀非輕慮有軍中  
動靜苦無備擬不免憂虞又陽翟去冬口有劫殺亦爲  
在鎮人少所以草竊公行居守寄崇臨制東夏淮西緩  
急切在隄防須假軍聲以重威望以臣庸懦又兵力至  
少夙夜惶懼曠敗是憂在臣至微豈敢逃責但以常備  
重任過承鴻私恐負恩寄有辜任使事理所殆不敢不  
言伏惟聖慮速賜裁擇輕冒塵瀆神爽震驚無任惶懼

殞越之至謹差押衙雲應將軍守左金吾衛大將軍兼  
試殿中監上柱國成黨奏狀陳請以聞謹奏

論吳少陽起復狀

淮西節度吳少陽

右少陽丁憂已近五十日未有恩命起復除官比來諸  
道節將每有起復皆不如此淹久亦聞少陽疾病頗甚  
如少陽不起卽朝廷因此便可處置况蔡州四面懸絕  
與山東不同伏計聖謨已有前定至如今日起復卽恐  
不可過遲况頃來朝中儒臣文吏如杜祐樊澤路寔皆  
不免有此今若議除替卽須准擬興師師徒一舉勞費



則甚京邑旱儉恐且須安靜養威蓄力以俟其時少陽風疾頗甚臣先已聞奏其勢非久可爲後圖東都與淮西相近在臣憂虞至切敢以疎遠干冒宸嚴輕竇上陳伏待罪責無任惶悸隕越之至謹奏

謝每年賜錢三千貫文表

臣某言伏奉今月三日勅東都留守額闕宜令度支每年支錢三千貫文充雜給用者伏以居守將士仰給有司省嗇之中經費猶闕臣頃以地隣淮右事切隄防請益師徒以崇威重至於費用未敢陳聞豈謂天澤旁流鴻私曲被救乏恤隱已極大君之慈曠官費財益重微

臣之責况違離軒陛周歷炎涼無補盛時有叨重寄恩  
光積厚荅效何階無任感戴悚懼之至謹奉表陳謝以  
聞臣某誠惶誠恐頓首頓首謹言

奏孝子劉敦儒狀

東都留守

孝子劉敦儒年四十九

會祖子立  
住東都從善坊

祖貺

父甲

右件人名儒史官之家積成教義至性誠孝感動人倫  
母患風狂心緒乖亂無故撈箠常至僵仆或凍於積雪  
之下或曝於赤日之中腐爛皸裂略無完體見其楚毒  
方肯飲食敦儒慙而復起常慰人知承順怡然不覺疾

痛因心之道貫於神明欲蓋彌彰事久方著烝烝不匱  
十有六年貞元二年留守韋夏卿具狀奏聞奉其年八  
月二十九日勅宣付史館旌表門閭臣至洛都具詳事  
實聞諸族類布在風謠今又十年不改其養飢寒所迫  
衣食闕然晨昏所奉朝不繼夕伏以底祿筮仕資蔭多  
門至行絕人尤可嘉獎伏望天恩特授一解褐京官使  
分司就養則計食可給寸祿爲榮庶厚時風以宏孝理  
特乞聖慈允臣所請謹錄奏聞伏候勅旨

謝賜冬衣表

臣某言九月二十日中使孟國瑤至伏奉其月十七日

勅書手詔慰諭臣及將佐僧道百姓等併賜臣冬衣兩副大將冬衣共四副者詔旨曲臨慶賜旁集凡在禪校一其權愉臣某中謝臣自違奉闕庭保釐河洛異戎師式遇之任非封部底貢之勤坐叨名器所謂尸素日月云邁寒暑迭來再及授衣之辰每蒙挾纊之澤被服輕煖章施賤陋彼已不稱於臣則多雖竭捐軀之誠豈逃濡翼之刺撫躬愧畏上荅何階無任慙懼感戴之至謹奉表陳謝以聞臣某誠惶誠恐頓首頓首謹言

請加置留鎮兵二千人狀

右留鎮將士雖有三千八百餘人偃師陽翟登封告成

等分鎮并軍將口儼諸色所由外在都城日勅二千人  
城門街鋪守當悉在其內陽翟當蔡州要路鎮兵不滿  
三百人都城人數已少更分減不得自舞陽刼殺已來  
臣夙夜憂切陽翟只隔襄城便與郟城接界寇盜侵軼  
事資隄防伏請量加置前件人數分在都城及陽翟鎮  
兩處防備所與完守遏其窺覷倘非事理迫切豈敢輕  
顯聖聽謹錄奏聞伏聽勅旨

留鎮將士加置二千人狀

右伏奉今月十四日勅留鎮將士宜加置二千人都城  
及陽翟分鎮仍速令招召精選強壯數足奏聞者臣伏

以都畿宮闕之重四方水陸之衝密邇淮夷兵數鮮少安危之計責在微臣夙夜憂惶逼擾是懼陛下神武獨運睿略下臨加此新軍保安洛土凡在都邑已如金湯敢願屏庸以膺駢策無任感恩悅懌之至其招召事宜已具別狀分析聞奏謹錄奏聞謹奏

請加置兵衣糧狀

右伏奉今月十四日勅留鎮將士宜加置二千人速令招召者伏以自元和三年准勅停防禦軍後皆散在坊市工庸爲生今令招召揀去老弱又畿內山谷間有武力勁悍者四軍留鎮軍子弟有成長強壯者旬日內且

合拾得一千人其餘至後月內並合得足伏以前件人等久藉軍籍不免飢寒招募之初須有露賚藉其速至必在樂從况當冬賜之時宜均挾纊之澤伏望天恩許臣招召入軍者便准舊官健例給冬衣月糧伏望下有司且支一千其餘一半待招召有次第後續具聞奏謹錄奏聞謹奏

河南尹裴次元充東都副留守狀

右伏奉今月十九日勅東都留鎮創立新軍所招將士切須精選要得府縣共詳簿書况分正副守仰惟舊典宜令裴次元以本官充東都副留守者伏以居守之任

分政是崇舊制河尹多兼副職以臣虛薄謬忝保釐陛下俯憂敗闕命此陪貳今淮右狂。尚稽天誅洛京重地每軫宸慮况新承詔旨創置軍師其於選募多闕府縣以尹守之劇同此在公佐庸菲之材俯矜不逮受恩斯重量力難任見與次元計會於諸色人中設法招召續具條奏無任感恩戴荷之至謹奉狀陳謝以聞謹奏

謹移義成軍一千五百人鎮陽翟狀

准今月十七日勅移義成軍一千五百人鎮陽翟縣右伏奉今月二十日詔勅淮西未寧東都兵少今詔平發步軍一千五百人於陽翟縣鎮守令權取臣指搆與



次元計會差官專往勾當供頓及排比兵馬下處善於  
綏撫無失機宜如淮夷犇衝卽逐便除討若無侵掠但  
且防遏優恤之間必資得所者詔命自天睿獎稠疊捧  
戴惶悚若無所容伏以東畿之中陽翟最重地非巖險  
境接淮夷斯爲要衝實在捍蔽兵力素少疆場是虞忽  
承天書已在睿筭分滑臺之堅甲佐甸邑之偏師戎行  
賈勇河洛增氣臣以懦劣素乏才謀陛下權令指撝假  
以威重謹當下竭庸管上稟睿謀循已何堪省躬知恩  
應緣置頓及到縣下處臣已與次元計會排比差官勾  
當其於撫綏必奠便安候將士等到鎮續具聞奏謹奉

狀陳謝以聞謹奏

謝除太常卿表

臣某言伏奉十月二十四日詔命除臣太常卿統和神人典司禮樂臣竇庸菲謬叨寵榮臣某誠惶誠恐頓首頓首臣以書生凡輩懦弱無堪生偶昌期累膺爵秩四掌誥命五居列曹遂叨禮卿乃佩相印竟無微效上蒼皇明自罷宰相再履宗伯旋忝保釐之任屬當優寄之時淮甸多虞周郊接壤上勞聖慮下輯戎師臣不敢愛身不敢避事頻抗手疏脩陳物宜苟披肺肝莫識忌諱自承詔旨許募新軍實使懦夫增氣輒思仁者有勇繕

本朝之...  
修器甲招集驍雄每竭一心敢有貳事陛下憂臣不逮  
全度特深出於殊私遽降新命沐浴皇澤從容大僚量  
力無庸底身何幸况太常者伯夷叔孫通之職豈易其  
人五六年間再居此地感恩知懼循分難任卽以今日  
三日進發瞻望闕庭踴躍欣抃謹奉表陳謝以聞無任  
感戴喜懼之至臣某誠惶誠恐頓首頓首謹言

應緣遷奉狀制書手詔等

山南西道節度觀察處置等使銀青光祿大夫檢校吏  
部尚書兼興元尹御史大夫上柱國扶風郡開國公臣  
權德輿右臣亡祖松柏先在東都臣幼年流寓江東風

聳鍾罰亡父母於潤州安措今歲在丁酉是商姓通年  
取四月二十日於潤州啟舉七月十九日於東都遷祔  
臣孤單零丁早失嚴訓寵榮累集霜露感深至於歲時  
難遇吉便常恐忽先犬馬莫展私誠伏以守土理戎不  
敢自求營護欲遣子弟專往不敢不先事上聞謹錄奏  
聞

勅某省所奏請遷祔事具悉卿移孝爲忠嘗竭弼諧之  
志慎終追遠每增霜露之恩無忘在公載陳誠懇眷言  
倚屬喜歎良深所請令子弟專往營護允依來奏想宜  
知悉春煖卿比平安好遣書指不多及二月十五日

臣德輿言伏奉今月十五日手詔許臣遷祔并合子弟專  
往營護者捧承詔書曲遂私志感泣嗚咽激於肝心臣  
德輿誠惶誠荷頓首頓首臣以童齒之年遭家不造壤  
樹所寄權在江南累經追崇當異徽數今龜筮叶吉日  
月有時伏蒙聖慈伏賜鑒察恩詔下降特允懇誠孝理  
所覃幽明知感松楸改卜永異事於九原蒲柳餘年異  
酬恩於萬死無任感戴怵惕之至謹遣押衙朝議郎前  
興元府金牛縣主簿張僂奉表陳謝以聞臣某誠惶誠  
荷頓首頓首謹言

使某官某

右臣伏奉去二月十五日詔命許臣遷祔起四月二十日至七月十五日合在准式假內使事請令攝節度副使檢校尚書水部員外郎兼殿中侍御史樊宗師勾當其府事請令少尹王士良勾當其間四使各有判官若事關師旅錢穀稍要重者并須有聞奏者臣自躬親不敢闕事謹錄奏聞伏聽勅旨元和十二年四月十日使奏

勅旨宜依四月十九日

使某官某 亡祖右羽林軍錄事叅軍倕

右臣亡祖仕於開元天寶之際文行聲實推重士林稟

命不融竟沉下位與當時清各之士席建侯包容蘇源  
明友善特潔唱酬文章各在集錄義方流澤以及先臣  
忠孝名節聞於天下累蒙追錫備極哀榮逮至微臣是  
荷祖訓猥以瑣劣過叨鴻私今檢校官兼官並至三品  
勲官及爵並至二品玷冒斯甚曠敗是憂况臣本官興  
元尹足領當道使務理戎撫俗不假他官其檢校吏部  
尚書兼御史大夫并散官勲爵並乞削免迺充亡祖追  
贈則殘生展霜露之感幽壤荷日月之光今先臣改葬  
轉祔就路亡祖舊域松楸是依倘因此時特沐恩禮使  
貽厥之報俯遂良誠罔極之懷下申先志聖朝孝理橫

絕古今懷懷肝血敢此披瀝無任哀懇迫切之至謹遣  
進奏官押衙朝議郎前金牛縣主簿張偃奉狀陳乞以  
聞謹奏

奉進止權某在選舉假內尋常公事任各差官勾當如  
有勅使及別奉詔命卽令權服恹服受進止四月二十  
九日

勅代必生賢爰進祖德恩當被遠用示朝章山南西道  
節度管內支度營田觀察處置等使銀青光祿大夫檢  
校吏部尚書兼興元尹御史大夫上柱國扶風郡開國  
公食邑二千戶權某亡祖故右羽林軍錄事叅軍榼舍



和體仁克已存道五常佩訓一命滋恭服先儒之大倫  
知穀也之有後謀孫是慶祚以公台歸葬惟時光乎邱  
壠佳域再啓緝禮宜申飾彼泉扃寵茲郎位式獎列藩  
之重且彰漏澤之榮可贈尚書禮部郎中五月十九日  
臣德輿言伏奉今月十九日制命臣亡祖右羽林軍錄  
事參軍倕追贈尚書禮部郎中號捧詔書欽承追錫聖  
慈孝理輝耀幽明流根漏泉感涕嗚咽臣某誠惶誠荷  
頓首頓首亡祖德風自振才命不倫人文推於士友天  
爵茂於仁義微臣虔守家法祇荷門風逮事之養不申  
貽謀之慶斯集累叨將相備極名器臧孫有後豈臣敢

當陳群慙德在臣爲甚乃者以改卜封樹輒披肺腑因  
先人之祖載加王父之徽命乞上印綬以延哀榮豈謂  
徵誠竟回聰聽德音煥發贈典褒優飾卽位以彌綸被  
大夫之物采儀曹辨禮幽壤生光恩波曲臨負戴無力  
將誓畢命以荅殊私無任感恩哀荷之至謹差進奏官  
某乙奉狀陳謝以聞臣某誠惶誠恐頓首頓首謹言元  
和十二年五月二十七日使上表

勅某省所奏請迴檢校官及兼追贈亡祖事宜具悉卿  
位更將相委重藩方褒贈自是典章豈必更迴官秩因  
心志切報本誠深已詔追榮良增嘉歎想宜知悉夏熱

卿比平安好遣書指不多及聞五月五日

臣德輿言伏奉今月五日手詔以臣亡祖喪贈自是典章豈必更廻官秩已詔追榮良增嘉歎者渥澤滂濡詔旨嘉獎捧戴哀絕感恩失圖臣某誠惶誠荷頓首頓首臣叨逢聖明付授踰量常慮顛墜不任驅策况以蕃方之重豈假臺省之兼昨因遷祔輒有陳乞所願少減名器獲申哀榮仰塵黷纘懼在鼎鑊豈謂天道下濟懇誠上通三復詔命五情震駭儒飾備至發於聖心弱質無膺旣玷聿修之德湛恩難報益馳匪懈之誠無任哀惶感荷之至謹遣進奏官押衙朝議郎前行興元府金牛

縣主簿張儼奉表陳謝以聞臣某誠惶誠恐頓首頓首  
謹言

使某官某

亡父贈太子太保某

右臣亡父取七月十五日於東都遷祔贈官是一品准  
式合有鹵簿幔幘人夫等謹錄奏聞伏聽勅旨

奉勅宜付所司准式

使某官某

右伏准去二月十五日詔命許臣遷奉自四月二十日  
至七月十五日合在假內今准假滿以今月十六日勾

當軍府公事謹錄奏聞謹奏

權載之文集卷第四十六

權載之文集卷第四十七

唐權德輿

表疏

論江淮水災上疏

貞元八年

八月日將仕郎守左補闕臣權德輿謹昧死頓首上疏  
皇帝陛下臣聞書曰百僚師師百工惟時又曰理亂在  
庶官然則獻替之司任當耳目所以達下人之利病廣  
君上之聰明惟野人炙背之微齊士九九之賤獎其誠  
心不致於罪伏惟皇帝陛下以大中大和武功文德亭  
育天下十有四年車書所至聲教大備微臣生逢明代

官忝諫曹既當不諱之辰敢陳無隱之直伏以人爲邦  
本食爲人天或陰陽之候暫憊水旱之沴小至匹夫匹  
婦未安其家納隍之心則有所軫臣伏見自去六月已  
來關東多雨淮南浙西徐蔡襄鄂等道霖潦爲災者二  
十餘州皆浸沒田疇毀敗廬舍而瀕淮之地爲害特甚  
因風鼓濤人多墊溺其所存者生業半空江東諸州業  
在田畝每一歲善熟則旁資數道春雨連夏農功不開  
人心旣駭亡者則衆幸者京師歲稔夏麥又登成爲根  
本之固以保斯箱之慶然賦取所資漕輓所出軍國大  
計仰於江淮以陛下憂勞方務勵精爲理之若是而天

災尙至者將使陛下聖慮日新又曰新而儆戒之耶不然臣所未喻也誠災不勝德賦有定制尙又留聖念因而拯之斯實代天理物爲人父母之明徵也伏望與元老台司定議速下德音遣使臣之有明識通方者將恤隱之命盡勞俵之方訪其疾苦蠲其租入與連帥守長講求所宜鰥寡幼艾周知其病詔令所下自如豐年休嘉感通疵癘銷散况賦無工拙皆取於人不若藏於人之爲固也蓋俾有司析量入之數節經用之源務求便安以去冗費縱災害不甚陛下過而憂之無乃益聖德之光大乎玄元皇帝之三寶曰慈曰儉曰德明皇帝之



昌言曰在知人在安人此陛下已行之効在恒久而已  
在敦固之而已臣每讀漢史至賈誼谷永之徒數陳理  
道痛言得失漢朝不以受之爲貶數子不以言之爲罪  
我太宗文皇帝之有天下也魏徵王珪等危言正詞上  
禪大化無疆之祚實兆於斯伏惟陛下遠覽西漢之風  
近師文皇之德則凡百臣庶敢盡其詞臣鄙賤頑固不  
識忌諱旣竊官命豈敢愛身蓋有所聞則合上獻雖蹈  
鼎鑊猶生之年不勝懇款惶恐之至伏惟陛下裁擇謹  
奏

論度支上疏

十一月十二日將仕郎守左補闕臣權德輿謹昧死頓  
首上疏皇帝陛下臣聞建官惟賢任人以器細大畢効  
轅輻無遺蓋就其所長以求至當古人所以有優於趙  
魏而劣於滕薛敗於栗邑而理於頻陽誠才各有所極  
也伏見司農少卿權判度支裴延齡早以文學累居官  
次固而似守刻而少通徒有專勤之心且非適時之器  
往者貳大農之卿長司太倉之出納號爲稱職蓋有恒  
規陛下急於獎能切於賞善權委邦賦美其有成且度  
支所務天下至重量入爲出從古所難使物無遺利而  
不可竭竭則害生類使奸無隱情而不可刻刻則傷人

和調其盈虛制其損益上繫邦本下繫元元苟非全才  
通識則有所壅自延齡受任已近半歲羣議紛然皆曰  
非宜且權其輕重固與守之之才不同邊儲經費之切  
樞遷移用之法貴無留事以酌乎中簿領簡書用行郡  
國失於毫釐利病相萬一物未理所軫皇情而延齡切  
於感恩昧於量力忠有以効強所不通則有枉尺直尋  
之心多方自固之計吏伺其隙人售其姦因緣蒙蔽觸  
類滋長致遠恐泥學製實傷異時甚敗罪之何補伏料  
聖意久未正授延齡職名似觀其能否以爲進退官司  
間里衆口一心評議諠譁所不可遏伏望與一二宰臣

時或詔問度支郎官使得以事實條對苟言者謬矣蓋  
有以辨之或才實未稱難恐久處倘擇能代命以他官  
以全延齡以便天下上副求理之意下遂陳力之宜則  
事任交修職業不廢臣忝備陛下諫諍之官嘗服師訓  
緘默自負無以爲容阮嗣宗口不言人之短臣心嘗師  
之但以束帶立朝則異於是職當獻納豈敢顧身耳有  
所聞心有所見義在無隱以奉聖明言而獲戾臣之死  
所不勝愚瞽惘欵之至伏惟陛下裁擇謹奏

請置兩省官表

臣某言臣聞堯之爲君也百工允釐舜之官人也九德

咸事伏惟陛下文明御宇建用大中德厚侔二儀利澤  
施四海中外庶政寢興求思舉一事必稽於禮法命一  
官必詢其望實故朝無虛授時絕幸人勵精萬樞超冠  
前古可封之俗比屋相歡詩曰嗟我懷人寘彼周行言  
思其才也又曰翹翹錯薪言刈其楚言選於衆也蓋在  
精別能否循責功實以爵祿爲砥礪以羣才爲鎔及則  
舉不失職人効其能左右掖垣首承明詔奉行詳覆各  
有攸司然後下於中臺頒於海內誠至重也彌綸政事  
侍奉軒墀分曹十員今則殆絕昔衛多君子晉有卿才  
况巍巍聖朝淳化所被濟濟多士豈謝古人要重之司

曠闕既久則事有所壅吏得爲非亦慮四方聞知謂朝廷乏士事關理道豈止官常臣以凡庸過蒙慈渥塵汚清近逾越等倫前後對敷備承獎飾德音顧問魂爽震驚而朴訥孱微不能自達又去四月三日面奉進止令臣有所見則條疏奏來者輒以愚管手疏上聞于責宸嚴伏待罪責無任兢懼隕越之至

云云

### 淮西招討事宜

右自去歲出師今已周月軍威未振寇孽猶虞中外臣庶實同憤切臣伏思之以王命討不庭以平天下師臨區區淮西之地况申光福小惟有蔡州以宗社威靈睿

謀上略所宜朝出令而夕獻捷乘城授首指顧可期今勝負之間猶未相直師老財廢勞而無功者何哉蓋有以也以寇之乘亂專地已十五年財征不至於有司杼軸難資於軍實而又峻威令同豐約獸窮則搏人自爲戰此皆必死之衆也以全義之忠朴果決固恩報恩而馭衆伐謀力或不足况山東士旅驕悍且久苟非威望素重者豈能制之又諸侯之師頭會烏合或幸灾養寇或緝力薄材勝旣衆分其勞敗又無所歸罪其心不一姑務自安此非成功之人也臣以爲徵師太廣命將太輕輕則無功廣則難制議者或曰統師之名不重則策

勲之時其賞易足偏師之任至一則勞旋之際其功自  
分且以希烈襄陽爲之懲創此乃知其一而不知其二  
也成功之後在法制鈐鍵之而已豈可早計過慮使陷  
於必不成功哉自古以兵多而敗者非一以近事則乾  
元鄴城之圍大厯魏州之討非師不衆也今因其數道  
會師可以精擇將帥武畧威重爲聖心所知羣情所伏  
者其餘方面二千石與汝鄧之地環寇四境度其不能  
者速易之兩河遠地之師未能制其死命者悉罷去之  
但以便地勁兵練其可用者誓以賞罰使之犄角設備  
於要害同心以進取程其力用如臂使指此決勝之道



也其次則嚴戒慎固勿與爭鋒來則遏其駭侵去則保  
茲經界使士皆賈勇終不妄動有虜獲者悉釋而歸之  
耀以武力浹之恩信旣無饋運之費又無殺伐之傷彼  
竭我盈可以歲月待其斃也倘以其未有出境之暴且  
開請罪之詞下詔班師曠然全宥雖根本未靖且罷戰  
息人又其次也若止如今者二十餘軍禁令不一以懷  
歸之衆無効命之心望其成功亦已難矣伏惟陛下留  
念

徐州事宜奏

右張愔狂愚敢阻朝命但慮強隣潛導故使之然或聞

移牒出軍屯於境上外示攻脅其實衛之倘諸軍進攻  
事至危迫度其不能濟也則必執以爲功旣居將相之  
崇又有討伐之績不待朝廷加地進律而徐方去矣雖  
萬萬無之亦不可不慮誠在率勵整訓合力急攻但一  
方底平則四方知想倘向淹時月未就誅夷則不如委  
以州師俾其傳達苟安反側以爲後圖但運路通流師  
律精勁更命文武兼材之臣徙爲三州節度且揚徐乖  
遠控攝異宜移鎮則兵力難分遙制則威重不足愚夫  
武校積習常情欲其復制旌旄不隸隣道但得人以授  
必易爲理又防閑暴慢皆在其初實由藩鎮歲深沒於

其位將校竊報恩之義子弟蓄樂禍之心陛下務人之  
安含垢屈法因以授仕其風竊然臣以爲三載考績先  
王之制或惜其爲理就加罰秩者不過五年則必交代  
不幸物故雖其子亦可繼之者麾下有可代之者則必  
授於諸鎮而命其師於朝不得已則命於隣壤又其次  
也擢其上介又其次也設有齟齬者則以嚴師臨之以  
大順責之人各有心固思自効凡舉事固計其當否而  
不計其濟否易曰師出以律否臧凶正謂此也位與望  
未至而驟居之其效必速又使人人有覬倖之心此四  
方所以多故也酌理道之源尊朝廷之柄歸於上則事

理於下但修之近者則遠者自至矣制於易者則難者自化矣如此則綱維畢舉利澤潛流自古霸王之道也易曰聖人感人心而天下和平伏惟陛下留念以前准右未平徐方猶梗師徒淹久率土同憂臣自十數年間叨禮官記言司言之任愚陋無補忝冒掖垣又思漢朝梅福以南昌尉之微猶遠陳時政敢以血誠管見博採羣情輒竭肺肝因陳本末理有似迂而實近言有過直而不誣干黷宸嚴莫識忌諱心魂震越伏待刑書無任懇欵惶悸之至謹奉狀陳奏以聞謹奏

給事中許孟容論齊愬授官事

右易曰聖人感人心而天下和平書曰嘉言罔攸伏然則致理之道在感之而已伏惟陛下睿聖欽明覆露宏納獎善求理冠於百王一昨許孟容以齊愬未有殊勞超擢非次上州刺史品秩過優駁議之司愛惜法度迫於守職不敢顧身封進詔書披歷誠懇中朝久無此事人情爲之愕然陛下特開延英非時召對輟已行之詔察無隱之忠天下之人踴躍相慶麟鳳五靈未足爲瑞臣能匪躬君能虛受使百執事之人盡忠奉上此寶瑞之大者自前日已來衆情爲孟容危懼昨日已來衆情荷陛下開納巍巍聖德橫絕古今朝廷欣欣感甚以泣

臣忝職近侍受恩每深不任抃躍悅懌之至謹奉狀陳  
賀以聞臣德輿誠歡誠喜頓首頓首謹言

論災旱表

臣德輿言伏見自春三月不雨連夏涉秋田里嗷嗷農  
收無望陛下齋心減膳憫惻元元告於宗廟禱於天地  
一物可祈者必致其禮一介有請者必誠其言憂人閔  
雨可謂至矣而甘澤未降衆情如焚公私窘迫日日以  
甚臣聞水旱之沴陰陽之數前哲王之所不免但有備  
之之術而已銷天災者莫若修政事感人心者莫若流  
惠澤人和浹洽則天地之和應矣昔堯舜在上天下無

窮人今陛下愛人之心遠過堯舜而猶有窮困未濟者此臣所未喻也敢以朴愚條陳管見伏惟聖慮裁擇一頃年縱旱亦皆有苗但時雨或愆不秀不實今則旬畿之內多有不下種而不生出者纔出短苗旋即焦乾者大率皆赤地而無所望流庸轉徙之人或移近輔或抵京西斃路彫耗於道途者又居其外但慮至種麥時無種可下頃者夏麥所收蓋寡旋屬早歉性命是虞迫於目前苟利餬口蚩蚩愚夫須與支計伏望以今年夏稅麥中各於本縣量留充臨時賑貸麥種今年秋稅除水利地據分數外餘一切放免遠年逋負悉皆蠲除發

德音下明詔沛然及物使皆聞知則人心重遷喜氣交感假使不放亦決無可徵不若先事圖之則恩歸於上此乃今之至切也去貞元十四年夏旱不甚於今官吏多督責取辦以爲心不副陛下視人如傷之旨至有縣令爲部內百姓歐擊者前事不遠伏惟陛下留念

一漕運之事以濟關中有司量入固已支計以臣愚所見且自東都已來緣路倉所貯米隨水陸節給倍程般運應給腳價皆與實錢務令速到京師不計在途省費續計料江淮米入運以備恒數又以太倉粟約一歲經費之外出糶於人則時價必減而蓄藏者自出矣



一書曰罪疑爲輕又曰宥過無大陛下已命省寺疏理繫囚各從減等務使原免此誠睿慈恤隱莫大之澤臣愚以爲不如特降成命敷宣於朝使轂下萬人渙然受賜又比來有經黜放者自謂永無錄用之期坐爲匪人感動和氣冬薦官踰三年未受命者不敢出城相顧以乞食溘然而就斃此亦窮人之一端也近有超擢黜於二千石者其徒必互相慰勉上荷聖恩雖未命者知牽復可望冬薦官皆敘已用適其輪轅此誠睿慈勤慮獎人於祿也伏惟因而宏之使人人自効昔顏子不貳過蘧伯玉知非則明古之賢人皆不能無過在知而改之

而已棄瑕獎善用其所長則無廢人此理道之至切也  
一天下理在百姓安百姓安在賦稅減賦稅減在經費  
省天下未有不由此塗出也生之者少靡之者多物力  
既屈人命必蹙大厯中絹一疋價近四千今止八百九  
百設使稅入之數如其舊出於人者已五倍其多又四  
方守臣銳於上獻爲國歛怨爲身市恩或廣軍實之求  
而兵有虛籍或倍地征之數而取以多方固非家財皆  
出於人力者也雖有心計巧厯能商功利者其於困人  
均也割股啖口莫甚於斯在陛下慮之而已行之而已  
大易節之說曰天地節而四時成節以制度不傷財不

害人伏望俾有司審量入之數節輕用之源無冗食  
無浮費百事省嗇以俟豐年此一救災恤患之切務也  
一前史云一時不雨人且狼顧今歷三時矣農之望歲  
以食爲天京師比屋惶惶靡指詩曰先人有言詢於芻  
蕘古語云愚者千慮時有一得况含齒戴髮斯人最靈  
伏望俾百執事之人皆得上言利病可者酌而行之否  
者容而恕之此亦側隱含宏之大要也

以前臣伏以今年饑旱京師艱食聖心憂軫臣下何安  
臣謂救之者不在於禱求乃在於事實有備者不止於  
公廩亦在於編人苟懷愚管不敢緘默上煩宸扆事或

非宜悽悽血誠所貴無隱不任惶灼隕越之至謹藁手  
疏以聞臣某誠恐誠懼頓首頓首謹言

昭義軍事宜

右山東節將有沃壤利兵三十年間竊以強大或父殺  
子繼起復臨戎名器雖出於中朝爵地實專於外闔澤  
潞素爲雄鎮磁邢洛與數道犬牙故欲變山東之俗先  
在擇昭義之帥可以練兵賦循法制鎮以威重扼其咽  
喉化彼譎張納諸軌度此爲樞鍵不可不慎慮從史拔  
自軍校列於藩垣以先朝含煦之恩積臣下寵祿之重  
且自建中貞元以來每命一方鎮遂綿厯歲時就加爵

秩以至於沒身弔贈自陛下聖澤亭育天威震曜吳蜀  
底定人神洽和三四年間易置節將出入中外者凡數  
十輩執介圭不俟駕者相望於道塗而從史宴安自居  
未著勲績頃來羣情猶望除代今則因其憂服可以慎  
選守臣况盧虔以文學至大官歿於闕下以從史之賢  
自可全儒家喪紀之儀宏聖朝孝理之道以從史非賢  
則連衡非人煽結爲患貽朝廷憂恐自此始且成德事  
體與昭義不同衆情以爲許成德之請則可許昭義之  
請則不可以恒奠習俗頗久倘類相因舍垢推恩制之  
以漸故土黨內地未嘗因循失之毫釐利害相萬或者

慮苟未受命則勞王師誘刦武人阻拒旬朔臣愚以爲  
凡朝廷計之甚遠大者以來至當倘成命旣下不時率  
道隣道戒嚴備於境上人各有心必思自効前秘書省  
校書郎薛貽謀比充從史掌書記去歲懇求罷免歸里  
京師臣比任禮部侍郎日貽謀進士及第數與相見訪  
其人情澤潞山東事體貽謀一二詳悉言其恩信不及  
於下若命將以伐萬無所虞或召貽謀陳奏亦異少廣  
聰聽事更淹緩轉失機宜臣備位班行稟性愚魯苟有  
所見輒披肺腑得於衆多事甚明白不敢緘默上疏上  
陳無任惶懼懇迫隕越之至謹錄奏聞謹奏

恒州招討事宜

右臣伏見詔旨以王承宗未稟朝命薛昌朝未赴德州  
大興師徒以務攻討中外臣庶不任憤激臣伏計數日  
已來朝官論用兵害者已多臣不敢更引煩詞徒惑聖  
聽臣今直舉管見二事冒昧上陳一則神策等兵在城  
中多是市井屠沽庇身軍籍未經戰陣難以成功經途  
既遠所虞非細或中路潰撓結為萑蒲未至交鋒別有  
此慮况恒奠馬軍素勁兵數頗多倘淹時月則損威重  
又西戎淮右兗狡多端或乘間犯邊或干紀  
出境禁衛武備不可頓虛山東猶疥癬也京師猶心腹

也不可不深以此爲念一則恐須便除成德及德棣兩道節度使則六州之人知有所奉兵交之際各圖自拔不然則以壤界所接而盡分其地如樂壽博野可以却還瀛州之類使其四隣各務攻取則人人自戰而恩歸於朝不勞師費則坐剪妖孽此亦必然之理也伏惟陛下憂勞之際臣忝備班行苟有所知不敢緘默無任惶懼懇悃之至謹錄奏聞謹奏元和四年十月十七日太常卿權某狀奏

山東行營以臣愚所見條件於後

一自去年十月興師討罪今已半歲未見成功時漸入



夏水潦疾病衆心不一主客相懸若更因循必慮潰撓  
竊聞自出師以來已費用五百餘萬貫物力旣屈人心  
則搖不可不深以此爲念

一山東諸侯未朝覲者各有息男爲副大使其心不相  
遠孰肯爲陛下盡力者耶以陛下神武睿圖埽定吳蜀  
凡觀陛下討王承宗者雖跡似忠蓋其意在於必不成  
功朝廷懲創遂不問山東之事此其計也

一凡舉衆行師須因衆心喜怒王武俊實有破朱滔之  
勞而地廣兵勁若更淹延挫損轉甚今日中朝公卿大  
夫之論莫若愛人息衆含垢忍恥沛然下哀痛之詔宥

其罪辜若更敗傷則無所及也

一若以直赦承宗誠人心所便而師出半歲無功而旋則不若因有制置使衆情有所觀聽如盧從史者誘設陳瓘每事逗遛責出草粟賤收縑帛倚寇爲援以邀寵利其間情僞非止一途此於承宗其過實甚今若於在近命行營節度令其倍道兼程度其行至半途授以澤潞然後別命從史京西已來一鎮旣離本處巢穴卽姦計不行新授朝命寵榮必不慮不至况聞其貪虐人心厭苦有所改更必求悅隨若從史除官及除替并恩宥承宗三道制書同時煥發則衆情感浹成命伏惟試以

此爲念

一軍儲國計仰給江淮江淮早歉人心日急若連兵不解則憂患非細頃者衆情以淮西三州之地四面勞師費財謂必命帥於朝以正王度昨者已除吳少陽充留後使伏計聖慈必以愛人爲心含宏覆育淮西旣猶如是卽承宗理固不疑但在速耳

以前臣自去年四月十五日上奏以欲變山東之俗先在擇昭義帥恐從史煽結爲患貽朝廷憂入去年十月十七日上奏以禁軍多市井屠沽未經戰陣倘淹時月則損威重今物情憂駭思竭肺肝以陛下聖德聖姿虛

受宏納敢以踈賤上千聰明無任惶懼懇悃迫切之至  
謹錄奏聞元和五年三月二十七日通議大夫守太常  
卿臣權輿奏狀

權載之文集卷第四十七

權載之文集卷第四十八

唐權德輿字載之

祭文

祭故秘書包監文

維貞元八年歲次壬申五月朔日故吏金部員外郎蕭存太常博士權德輿大理寺丞王純等謹以清酌庶羞之奠敬祭於故秘書監包七丈之靈在漢鴻臚蔚爲各儒以續簪裾乃生秘書純誠伉直古訓是式納忠宣力有勞王國昔自秀造翰飛扶搖彌綸劇曹領袖清朝出入諷議嘉聲孔昭時塞時通乃領藩條俄復郎署俾均

繇賦經費委輸待公而具受命匪躬於汴之東秩宗之  
貳司憲之雄鑿輅時巡關梁未通每以貞勝行於險中  
登賢求舊人佐司寇中和直清望與實并乃總師氏三  
德興行又領秘邱六藝章明息偃文囿優游漢庭雅韻  
拔俗清機入冥立言大旨爲經爲紀中行文質不華不  
俚魯史一字詩人四始泝其源流用制頽靡以誼藩身  
與道爲隣虛中皦然不棲緇塵動靜專直儀形摺紳得  
喪虧成靡滑吾真宜介嘏福宜受戩穀未及下壽胡爲  
不淑遺孤藐然銜恤茹毒善慶不誣期於必復某等劣  
薄嘗承討論通世宿好嘉招厚恩舞雩春遊昔實童子

峴首良會俄叨知已歲月遄邁或行或止慰薦難忘音  
徽不已各忝一官來歸帝里話舊語新悲歡未幾驚疾  
癘之潛遘冀无妄而有喜信宿之間格言在耳精識不  
亂達生大觀謝醫禱於門人順一氣之聚散大均無期  
化往何之邦國殄瘁古今懷其虛室寥寥總帷披披哀  
從中來雪涕交揮柔嘉列籩清酌滿卮神之聽之噫嘻  
格斯尚饗

祭故韓祭酒文

維貞元十年歲次甲戌三月朔日徵事郎守左補闕權  
德輿謹以清酌庶羞之奠敬祭於故國子祭酒韓十四



丈之靈伏惟德厚流光炳靈發祥傳慶於公尊爲珪璋  
宣力中外道光明代動必有裕直而無悔從容諫垣密  
勿絲言炳然憲章潤色化源六

一作天

官之貳京劇之貴

四方取則九賦不匱蓬山秘書大學尊儒選重前代非  
賢勿居率是明德便蕃右職宣其馨香昭其物則四科  
難並全才乃克利用無方沛然餘力再世金鉉確乎匪  
躬光輔帝道是爲門風緇衣棣華宜復於公終歿人望  
天乎不傭顧惟小子夙承先友骨肉之契歲寒逾久爰  
自齟舛深仁善誘恤此殘生均其所友衣而食之祿而  
仕之闔門仰給纖悉無遺仁惻之道曲盡其宜二十年

間完安保持比肩多士忝跡清時必出念慮敢不知思  
秦原蒼蒼丹旒遲遲精魄何徃音容莫追沉哀激中雪  
涕交搗神鑒如在含酸托詞尚饗

祭故盧華州文

維貞元十六年歲次庚辰四月己巳朔八日景子從表  
弟朝議郎守中書舍人雲騎尉賜緋魚袋權德輿謹遣  
使以清酌時羞之奠敬祭於華州刺史御史大夫盧六  
兄之靈詩謂君子溫其如玉書稱正人既富方毅明靈  
比德清機所屬未極全才如何不淑追憶曩歲鍾陵嘉  
招兄時左遷屈佐乘輅幕庭山郭並榻連鑣心同則親

敢曰常僚俄奏郡課復升郎位左掖斯密教官已貴殘  
骸被病土梗蓬累謝交辟以未能方屏居以自遂拔茅  
推轂遐蹈古義七發粲然八行狎至詔下江干猥登禮  
官顧蓬次之鯁生忽束帶於朝端暇日良夜清言舊歡  
再披雲霧永契金蘭帝念長人出臨左輔河潼襟要復  
此居部乃亞丞相金龜映組美利休聲和風甘雨弱植  
何幸累叨禁垣諫署右史以至司言因緣踐履根本推  
援恐累知人上負時恩一違晤語九變涼溫日夕音徽  
切劘討論發函嚶嚶如見君子或忠言以規過亦善諱  
而溢美冀登柄用以永介祉每襄首於公朝期盍簪於

仁里俄驚感疾方俟有喜志切乞身恩深卧理神道與善胡然不起寢門一哀孰甚知己素車莫遂雪涕何已樽酒盞貳深誠在此尚饗

祭故戶部崔侍郎文

維貞元十九年歲次癸未十月戊寅朔十二日己丑中書舍人楊於陵禮部侍郎權德輿謹以清酌時羞之奠謹祭於故戶部侍郎贈右散騎常侍崔君之靈古之大觀推理以達謂生爲勞於化不怛苟非至人哀樂云云一欣一感松茂芝焚遐想深契在於夫君素履無玷黃中有文卓爾堅明皦然貞醇夙以聲實邁於羣倫伊肯

宦遊風塵不雜聯簪法冠並列賓榻夷道可久淡交相  
台亦旣府除索然離居或憇循江或旋練湖君初卷懷  
寓彼羣舒四三年間聯奉詔書分曹事師議禮天子中  
臺奏議並列哀烏道舊放懷話言于子三登首曹乃貳  
司徒相顧飛翻接影天衢顯允德素大僚是都凡我四  
人交歡靡渝直諒是程中庸是經或會公朝猶疑莫庭  
孰謂夫子奄然冥冥交臂相失沈瀾涕零入室敷敷孀  
孤之聲追懷悼心痛我友生密印左貂以哀以榮嗚呼  
哀哉命之所賦豈有其數乃如之人洵美無度常日謂  
我文昌聯步如何今茲已隔泉路齶齶良話依依平素

晦明再暮冥冥大暮萬事風燭九原草露魂之來兮歆  
此薄具尚饗

祭故梁補闕文

維貞元九年歲次癸酉十一月朔日左補闕權德輿等  
謹以清酌庶羞之奠敬祭於故右補闕贈禮部郎中梁  
君之靈我思古人乃得敬之今則不見嗚呼噫嘻賢哲  
之生作瑞於時中立不倚大道甚夷人或多方以取世  
資君懼其至泊然靈龜游夏遠矣文章運衰風流不還  
作者蓋稀君得其門獨泝澆醜遐蹈古始六經爲師初  
冠章甫在江之滸忘形交臂或出或處久要之契膠然

相與直諒切劘曠懷無阻漢廷虛左尺一旁午心與雲  
閑翼隨風舉恬漠虛白環中之樞篤厚承明君子之儒  
精義入神英華發舒人所景行君之緒餘乃補衮職乃  
侍皇儲北宮密命東觀直書致用無方迎刃皆虛漸漬  
教化閭然而孚文武憲章堯舜典謨空結時望莫申令  
圖宜錫華皓以極其道鍾美實多歸全太早子淵之仁  
叔度之賢皆厚其才而奪之年吁嗟敬之今亦已焉孰  
司化工不與其全凡我同人官次周旋微言嘉話悅若  
目前吾欲問蒼蒼而訴冥冥索夫子於重泉未如之何  
從古以然平生一樽哭奠靈筵魂氣何往空傷絕絃尚

祭故唐舍人文

維元和元年歲次景戌正月景寅朔十九日甲申戶部  
侍郎權德輿謹以清酌時羞之奠敬祭於故禮部郎中  
知制誥唐君之靈嗚呼文編行茂才全弱冠知名時推  
雋賢含章振藻金石在懸緣情放言采組相鮮憶昔淮  
湖與君覲止忘形合志造適通理瓜步邗溝吳山楚水  
芝蘭之室三十年矣君自左史進居臺郎子叨禮官亦  
忝周行熙春至止休沐相將纔盍簪於上國俄出守於  
遐方盛山雲安風水迢遞屈此二郡俄然半世文章煥



發書札相繼辛酸苦言欵曲嘉會顧我忝曠愧君淪滯  
屢封薦章輒以人廢每與公範交修宿契不進不止中  
心自誓大君繼明元凱持衡方開宣室以待賈生裁成  
訓命所謂文炳詔君居之士友相慶遲遲征軒來自荆  
門凡我同人載勞夢魂屈指繼日俟君西垣不及百里  
俄歸九原嗚呼文編此痛難言壽堂野土一別終古平  
昔風姿杳無處所樽酒簋貳涕零如雨冥冥之間神其  
聽否尚饗

祭故李祭酒文

維貞元七年歲次辛未五月朔日故吏前江南西道觀

察支使監察御史裏行權德輿謹以清酌時羞之奠敬  
祭於故國子祭酒李公之靈伏惟峻闕洪宗有勞有忠  
光耀北朝黎申繼封世各清純以至先公彌綸盛時德  
位昭融文武吉甫克嗣其風儲慶發淳擇乎中庸天寶  
中年仕無異門講道積學五經紛綸以能詔官校理秘  
文溫若玉質郁如蘭薰絃琴峩峩擁傳鞞鞞兩無留事  
並著嘉聞題輿佐理剖竹爲政均彼化條簡其徵令風  
行草靡飲和發咏難理之時四封謐靜累遷大郡亦佐  
成師宣其馨香蠲彼癘疢時有行止道無磷緇虛中十  
年觀我靈龜大君嗣位推擇良守乃眷上游作藩夏口

報政獻功察廉一方再扞大憝以完南邦盡殪舟師王  
旅乃張衆寡相懸以律而臧就加副相乃鎮西江來歡  
去懷金石洋洋剛柔全德蹈履不忒外無墻藩之峻中  
踐夷坦之域爲仁由已率誠不飾播厥美利根於易直  
災去水火人滋衣食流庸胥附生齒益息亦旣七年慰  
安斯人冲用知止封章乞身朝典崇儒徵拜成均遽歎  
夢奠俄驚返真猥以蒙蔽再塵盛府重問縟禮蓬茨之  
下惠愛博約深識見與左右彌縫愧無所取九江拜手  
浹日前期如何奄忽過隙生悲羊公峴首良會無時庾  
亮樓中永絕清機前歡幾何圓魄纔缺承訃長慟潺湲

涕咽返葬迢遞西周古原柳車芻靈飛旒翻體魄則  
降德馨長存拜奠心碎難酬舊恩尚饗

祭故薛殿中文

維貞元七年歲次辛未某月朔日前監察御史裏行權  
德輿謹以清酌庶羞之奠敬祭於故殿中侍御史薛七  
兄之靈有生必化大鈞之方盛極而衰乃理之常又曰  
善慶鍾爲福祥今則繆盪天心茫茫追維明靈風播馨  
芳解巾秘府累冠神羊清明之用百鍊堅剛麗藻之文  
六律鏗鏘嘉言婉婉令問章章靖恭端和休有耿光纔  
踰強仕未踐周行衆情頽然日遲窳翔早維通舊已飲

馨香晚忝常僚載換星霜府庭同舍居室隣墻切劇惠  
愛何可弭忘憶昨從公泐泛長江賓榻初散雲帆並張  
晨登佛廟晚眺漁梁善謔理窟清言智囊旣濟江浦俄  
驚府喪同悲未幾今也則亡古稱臧孫德遠流長遽歎  
伯道永絕蒸嘗嗚呼不備難究蒼蒼上歸元漠下閔幽  
荒呼天者兄晝哭者孀琴書已矣行路悽傷柔嘉備籩  
澄齊滿觴神其格斯搗涕浪浪尚饗

祭故屯田柳郎中文

維建中二年歲次辛酉某月朔日試右金吾衛兵曹叅  
軍權某謹以清酌時羞之奠敬祭於故屯田郎中柳公

之靈有

在一作

漢理平子陵退耕運鍾明時公遂性情典

校司諫便蕃清秩南宮之拜詔書三出中朝虛左公志  
不屈優游化源消息心術四時芬芳百鍊精剛德充於  
中用晦彌光是非萬殊不滑其常和易內蘊發於文章  
性命之際希夷之域理無不窮言必冥極救彼文勝作  
爲異式扶教立言實在清德時方逐進公則尚退人或  
外獎公則理內獨立不惑以身矯世萬頃淵然孰知其  
際顧惟小子狼奉音徽賞則過實勗常中非目想德容  
心有清機今則不見涕流霑衣嗚呼哀哉人世則異清  
風不匱總帳寥寥泉臺下闕常聞福善今也無嗣力命

如何斯文其墜尚饗

祭故海陵李少府元易文

維建中三年歲次壬戌某月朔日試右金吾衛兵曹參  
軍權某謹以清酌庶羞之奠敬祭於故海陵縣尉李君  
元易之靈我得元易於茲三年粹秀清和仁義在焉行  
有餘裕其文粲然五字之中含寫風煙巖扉舊隱常聞  
清興諸生討論雅有時稱初與廬群德倫同隱居於譙山理實歸研境  
無逃勝嘉招既至虛中已應從容解巾作尉江濱退以  
直道進無中人徃志彌篤郊居食貧衡茅之下孤石聚  
均連墻者何則有元鈞元鈞名勳君之族父探味元奧疎適心神

晚獲覲止心乎愛矣扁舟往復就館於子靜賞烟霞深  
窮各理友直友諒惟君是已行不苟容必俟良工棧繫  
絕足橫閉銛鋒竟嗟不試一命淪躓身沒跡晦靡申素  
志惟富與壽君則不至人皆有子君獨無嗣總帳飄飄  
靈座深閟幽顯此殊嗚呼元易尚饗

祭故李處士文

維貞元二年歲次景寅十月朔日試右金吾衛兵曹叅  
軍權某謹以時羞之奠敬祭於故李處士十六兄之靈  
惟先吏部文德冠時天下翕然有所宗師鍾美於兄式  
克似之爰自穉歲淡然清姿惟我與兄世有舊歡應若



頃篋芳若芝蘭居易處厚中明外寬發於濬源激爲清  
瀾放懷外物清機善諳討論不倦各教爲樂迭用古義  
以相博約先王觀風命史陳詩雅南之後其道日醜騷  
楚怨思王風澆夷升降之義與代相隨國朝數公稍振  
舊風兄實求已服勤於此敷陳麗則不野不史含寫佳  
境優遊精理七發未終俄驚不起追惟前年訪我由拳  
握手開襟慙歎欵言孰謂此訣死生間焉今我來斯舊  
館依然文伯旣沒敬姜哀慟子敬下世徽之永痛嗚呼  
哀哉流形賦命孰主張是昏闇闕茸或壽或貴方直清  
明迺天迺否如何斯人才命不侔未室未仕溘與化俱

志業靡申沉痛泉壚福善與仁胡其忽諸嘉肴在篋旨  
酒在壺寄此一動汎瀾涕濡尚饗

權載之文集卷第四十八

權載之文集卷第四十九

唐權德輿字載之

祭文

祭故獨孤常州文

維貞元二十年歲次甲申十一月戊申朔一日戊申禮  
部侍郎權某以清酌庶羞之奠敬祭於故常州刺史獨  
孤憲公十四丈之靈嗚呼德充而位不配才大而年不  
遐稽於賦命從古太息伏惟蘊大雅之愷悌遵六二之  
直方作爲文章律度當世粲如日星炳若龜龍施於政  
事表率方國三郡洽和四封鼓舞而不得宏大志業歿

於中身豈洪鈞造物使才命相盪先師罕言末如之何  
伏以先子篤忘形之契小人展無容之敬去世二紀清  
風凜然顧以息女歸公愛子雖不獲逮事而備承家法  
况茲菲薄實忝眷私辨方之年違離於江徽志學之歲  
伏謁於郡齋典司禮職常奉易名之議嚮仰德門今承  
合姓之重誥言誘掖造次敢忘德容碩姿髣髴在目自  
爲聲舉之重今則潘楊之歡二孤純孝遺烈鍾美鮮原  
改卜日月有時酒肴靜嘉式薦靈位尚饗

祭故獨孤台州文

維貞元二十年歲次甲申十一月朔戊申禮部侍郎權

某謫以清酌庶羞之奠敬祭於故台州刺史獨孤七丈  
之靈洪範五福古人所貴伏惟道樞德機涵咏交鬯解  
痼隱几譙自東吳膏神而去物累觀化以順天理終始  
貞吉歸全返真不登期頤者十數歲而已可謂康寧而  
壽以至考終命宏修政事遵職居部泝汾潞河四遷二  
千石朱轡暢轂所至治平率誠理身以化封內可謂攸  
好德其所以異者富於義而遠於利以祿直賙姻婚以  
清白遺子孫故卽遠之日轉褻纔具孤嗣藐然以賻布  
襄事蹈道如是君子以爲難介弟憲公挺此文德含章  
炳然與三代同風先門友善義比金石猶子秀茂申以

婚姻引進琢磨居爲雅器永懷感悅異奉話言女子有  
行得奉門訓竟迨道途之阻未申供養之禮用此歎慟  
結於中腸輻車東來大隊斯啟柔嘉清滌用寄單誠尚  
饗

祭故賈魏公文府十月

維永貞元年歲次乙酉十月景申朔二十三日戊午朝  
散大夫守尚書戶部侍郎雲騎尉權某謹以清酌庶羞  
之奠敬祭於故司空相國贈太傅魏國賈公之靈覆載  
之間肖形必化惟令德淑問與天壤俱伏惟以舍一之  
量叶休嘉之運四征授律勲在盟府二揆居中勤宣宰

政注意體國繫公是圖始自黃綬至於元袞率由坦夷  
以極光大浩若溟海熙如春臺歸全之日朝野相弔窮  
珣戈金鉉之寵可以言貴過懸車貳膳之年可以言壽  
中和博大之度可以言君子知命順化之理可以言至  
人三朝告老終不得請法賻吊祠禮加常數鄙薄無似  
辱公之知獎進切劘逮茲一紀獲居里閭亟踐堂奧拔  
俗之韻忘年之歡疑在視聽忽成今古嗚呼魏公可勝  
勵耶潔此觴豆奠於冥寥髣髴風彩公其降靈尚饗

祭故張工部文

維貞元二十一年歲次丁酉七月戊辰朔四日辛未禮



部侍郎權某謹遣男瘵以清酌庶羞之奠敬祭於工部  
侍郎兼御史大夫贈禮部尚書張二十九兄之靈士君  
子所以暢其業者文也學也士君子之所以植其本者  
正也忠也綽綽工部實由於斯起於逢掖乃執簡記章  
明義類振起褒貶博物洽聞時稱良史可不謂文乎誕  
章成式變理疑議稽合於古節適於中羣士屬目一言  
以決可不謂學乎處爍原盜泉之下不焚不濡終然遵  
韜皦潔貞厲狷狷權倖惡厥中立一罹讒鑠遂去清近  
秘邱十年不得自是可謂行己之正乎出疆專對照  
耀原隰天覆之內無遠邇君命之下無險夷再叶翟士

乃和戎索暢威靈於大荒之外啟手足於野幕之下可不調事君之忠乎年纔逾耳順官止貳起部於兄之量二者皆屈彼大蠶大僚孰宜之哉頃陪禁掖俄接仁里觴酒歌詩清言善謔靡日而間彌年以歡一瞬之間奄成今古以此哀思如何可忘跌傷左足未任趾步鼓吹臨門涕洟如雨平生風味今日永訣伏枕口占寄懷斯文尚饗

祭故杜岐公文

維元和八年歲次癸巳三月甲寅朔二十八日辛巳禮部尚書權某謹以清酌庶羞之奠敬祭於故太保贈太

傅岐國公之靈伏惟體溫厚之氣協休和之運五常用  
仁九德在寬六朝揚歷三后公相契作司徒夷居太保  
致位遂志晏閑顯尊極人倫之壽寵居一作簡君上之恩

禮傳曰行道有福詩曰求福不回考祥視履惟公是已  
至若倘佯化元保合太和扶道嘉會將明利澤漸漬於  
生民而隱於視聽者可勝道哉早辱招辟任纔初命頃  
沐鴻休職聯大任周旋惠愛三十餘年公府閱議郊居  
盛集滄溟沃日之量清廟禮神之器四教五福明哲始  
終話言風采疑在夢想變化糾紛何可勝論常日賓榻  
今茲靈位常日歡言今茲聲淚常日精爽今茲魄氣常

日鳴騶今茲騎吹永去昭代言歸厚地平生一樽拜奠  
獻猷尚饗

祭故徐給事文

維貞元十四年歲次戊寅八月戊寅朔十日丁亥右諫  
議大夫裴佶中書舍人翰林學士吳通微中書舍人高  
郢尚書司勳郎中知制誥權某尚書司勳員外郎知制  
誥翰林學士鄭絀起居郎韋丹左補闕翰林學士衛次  
公右補闕王紆右拾遺史館修撰蔣武等謹以清酌庶  
羞之奠敬祭於故給事中贈禮部尚書徐公之靈太伯  
延陵化於東吳遺風禮讓乃有名儒懿懿夫君文誼是

圖早歲清名輝動江湖遐覽古音琢磨無數以五常爲  
師味六學之曠始以處士交馳府辟乃考秘文諸生表  
的周畿結綬吏隱方適三命登朝禮文損益旣肆業以  
綿蕤亦說經而重席踐履中臺翾飛左掖舍章載筆侍  
講通籍循性不遷虛中靜專駁議清禁於茲八年同官  
爲僚惠好歡然瑣聞密近蘭室周旋分曹直夜接武朝  
天會清機於妙理每捨筏以忘筌如何稜疾亦旣旬日  
謂勿藥之有喜俄交臂而相失死生同途力命難俱焜  
耀終始恩深禮殊榮眷官於夜壑振簫鼓於塗芻平昔  
談笑倏然虛無含悽寄詞絮酒焚枯願執紼以莫尋莫

靈筵而涕滯尚饗

祭故奚吏部文

維貞元十五年歲次己卯十二月庚午朔二十六日乙未右諫議大夫裴佖給事中許孟容李元素陳元中書舍人高郢權德輿兵部員外郎知制誥崔邠等謹以清酌庶羞之奠敬祭於故吏部侍郎贈禮部尚書奚公之靈竹箭有筠黃裳有文惟公實然早播清芬射策筮仕鬱然令聞翬飛迅颺凌厲層雲乃踐清近時登傑儔選當視草中亦難進南官西掖砥礪銚刃奏議練於程品贊書稽乎典訓貳職司寇時惟欽慎獄有煩言訟公卽

訊惟直是從確然蹈中雖申申以晉子終蹇蹇而匪躬  
五歲啟事九流承風寬以有制峻而能通宜躋大年以  
至宗公絕足方騁修途忽窮信等或早陪交好或嘗接  
官命懷鮑叔之深知仰晏嬰之久敬里第方葺蘭萱滿  
逕平日徽音未移視聽乃者寢疾猶期善慶孰謂旬時  
奄然大病上軫宸衷榮加飾終題劔告第恩殊禮崇吁  
嗟祖載去此昭代儼丹旄以就途紛素車而來會晤言  
如在神鑒豈昧何以洩哀寄茲一酌尚饗

祭故呂給事文

維貞元九年歲次癸酉正月庚辰朔二十一日庚子右

諫議大夫陽城給事中徐岱李衡中書舍人奚陟尚書  
駕部郎中知制誥張式左補闕權某等謹以清酌庶羞  
之奠敬祭於故給事中呂公之靈君子之道貴乎艱貞  
公用踐履剛中粹精文學政事蔚然特名出處屯夷用  
晦而明君命佐戎于彼淮甸方國多虞妖氛潛扇每以  
明誠奠其革面外蒙恥以枉尺中飛章而告變白及臨  
前丹心炳然貞其困而後濟忘其生而後全履診旣平  
忠勞亦著草奏南宮嘉聲載路出領符竹澄清遠部夕  
拜黃扉昭宣王度獻歲朝天侍立君前華纓玉佩行止  
鏘然周旋陟降接踵差肩如何累日奄闕重泉嗚呼哀



哉寓形此世無非大夢寢門之外莫甚斯慟交歡幾時  
踰月於茲每奠休沐相從譙私孰謂奄忽俄生癘疵醫  
禱不及形神已離某等或辱在常寮或忝陪下列喜雲  
霧之初披恨幽明之遽訣瞻彼塗弔言旋洛都平昔智  
一作志氣復歸虛無酒肴靜嘉盈俎滿壺何以道意潛然  
涕濡尚饗

權輿之文集卷第四十九

權載之文集卷第五十

祭文

祭戶部員外叔父文

維建中四年歲次癸亥月朔日從姪某謹以清酌庶羞  
之奠敬祭於故戶部員外郎十四叔之靈福善降祥是  
爲教源至於性命古人罕言沴氣交薄作爲天昏慘闕  
時和殄瘁人賢不極修途不登大年命屈其志古今共  
然追惟叔父顯顯令德統九流於靈府貫百行於精識  
昔在中禍卽爲聞人冰玉之姿穎然不羣禪惠通性文

章發身清談一室車騎如雲辟書交至使者結軌譏孟  
晉以近名隘并介之不起從容翔集盡於知己故顯昧  
之間皆酌中合禮江南擁旌主東諸侯參佐之選時稱  
先儔婉婉良畫心和智周史於一言惠澤旁流再履卽  
署三叅憲府十年之間赤紱在股暢恬淡之元姿期青  
冥於步武厚夜何言夷途遂阻憶昨拜手猶承晤語旬  
朔之間奄成終古塗芻旣列哀挽旣發族子之念偏深  
林下之歎永絕胡爲造物胡爲天闕悠悠九原拜奠酸  
咽尚饗

祭外舅相國安平公文

維貞元三年歲次丁卯十二月朔子壻試大理評事攝  
監察御史權某謹以清酌庶羞之奠敬祭於外舅故相  
右庶子安平公之靈元精熙熙大化法法合散萬形以  
陶以鈞感和合祥則生鳳麟含粹炳靈乃有仁人嗚乎  
安平受天清淳全德不器大方無垠恭聞稚歲卓爾殊  
異亦旣冠字確乎其志去華務實探幽索秘窮盡化源  
深入精義上下千古周流百氏自觀靈龜不鯁駟餌考  
古立言其文煥然乃論皇極乃志元德誠洞窈冥言經  
邦國幽蘭在林鳴鶴在陰嶸嘖芳芬越自重深安貞用  
晦其道乃矢卷舒之間律呂相會相會者何時惟贊皇

受命開府作藩東方美公德輝闡然而章車乘翹翹重  
禮以將連茹時賢是集是翔駟駟印印萃於公堂古之  
待士懼其不至故賔不自賤而主不自貴道薄俗矚其  
風寢墮苟於所以又患失之故戟戶益尊華戶益卑名  
節不立廉隅以虧公之出處時之準的閭閻直詞婉婉  
嘉畫贊皇爲主安平爲客化被勾吳幾於耻格令德孔  
昭觸刑登朝或塞或通不磷不凋乃補衮職柔嘉剛克  
右掖旣言其詞則直直方明謨與古爲徒以真言爲已任  
願致君於黃虞屢封皂囊亦伏青蒲爰啟爰沃乃咨乃  
俞羣墨惡白行吟楚澤歲久逾芳剖符建陽政和用

易邦人樂康興元之初王旅未振或任專征且迷大順  
區區遐方獨抗忠憤馳書激切訥喻方鎮飛章間道旁  
午奔問密疏安危以扶皇運翠華旋宮馳駟命公選部  
爲郎郁郁清風克厭帝心給事於中乃贊大政以釐百  
工謂俾元元旣庶而富未展緝熙遽罹沉痾移疾請告  
乞身抗疏留中久之不忍其去乃相東朝禮備優賢方  
冀勿藥再持化權蒼蒼者何不錫永年壽屈其才從古  
以然內惟小子控蒙褊吝昔歲羈牽遇公於信亭伯直  
道君山佐郡莫際波瀾幸窺墻仞因曰世與道交喪恬  
與智相養盍晦而明盍性而情虛中蹈道以此爲經亦

既歸止貧居練水靜守緒言期於沒齒芳訊忽至開緘  
盈耳申以嘉姻眷同國士心合義固尺書而已禮異常  
情感深知已育徽相繼封壤或殊迨前年之仲春獲結  
甘於楊都夙承師友戟反門間阻拜禮於上國承施矜  
於外姑九江之西謬見羈束惡愛則深格言相屬固窮  
難進是導是勗心知善誘力有不足一曠清德七年於  
茲物類形留神交坐馳亦謂恬曠漸消癘疵不虞不圖  
凶訃來斯哀激中腸決於四支恨情禮之未展痛幽冥  
之永辭藐彼二連樂樂孝思德以遺後魂無不之東洛  
西江支離拘限迹滯暮庭心馳祖奠嗚呼哀哉賢人之

生力命難并年中身兮道未行去昭昭兮卽冥冥一往  
不復空留淑聲銜酸托辭庶達明靈尚饗

祭故外姑河東縣君支

維貞元十一年歲次乙亥十月朔日子壻起居舍人知  
制誥權某謹以清酌庶羞之奠敬祭於外姑故河東縣  
君之靈伏惟承積德之慶稟醇仁之性嬪於盛門播此  
淑行恭聞幼儀以及結褵居然嫺直不待姆師朝尊相  
府家榮命婦琴瑟和聲珩璜節度執謙處約不改其素  
專靜是宏紛華靡務四德日滋六姻是宜睦親以誠撫  
下以慈內則之禮采蘋之詩夙夜無違如春熙熙道備



移天哀纏晝哭闔門之訓斷織是勗期於榮養以俟豐  
祿方慶綵衣遽驚喪服顧惟鄙人辱奉嘉姻十年之間  
情以禮親頃歲遵阻遐方食貧殘生未減慰訓相循俄  
忝周行來歸帝里駟車邁邁盡室至止舉觴爲壽侍坐  
以齒令節游娛溫顏燕喜浮生如幻寢疾未幾遽此全  
歸難徵神理樂樂棘人泣奉塗芻翩翩素旌東指洛都  
征途在目官局所拘含淒國門拜奠路隅仁愛如昨幽  
明忽殊托詞寫哀庶達泉壚尚饗

祭故建昌崔丞文

維貞元十一年歲次乙亥十月朔日姪女婿起居舍人

知制誥權某謹以清酌庶羞之奠敬祭於故洪州建昌  
縣丞崔六伯之靈伏惟北州茂族中庸令人行有枝葉  
道無緇磷居常葆和動不違仁素履坦坦閨門申申于  
真恬退張仲孝友淡而不厭晦而能久亦旣再命皆以  
退聞天爵之外視如浮雲謝病郊園深辭世紛遲多芝  
朮家有典墳心遊杳冥手植芬氤行樂春晚開襟日曛  
謬忝嘉姻獲奉深分曩時上策旅食江郡一葦可航百  
里而近長筵式晏虛室清論少長無違琴觴迭進仰名  
教之可樂見義方之善訓暇日則多窮年無悶不耗天  
理同乎大順頃服朝命言旋帝鄉畫室出祖至於朱方

離居未幾四換炎涼凶訃忽來哀何可忘山川阻遠情  
禮未展犯塗潦以無由想音報而在眼敬美知禮鯉也  
聞詩昔著婦行今推母儀婉彼令姪承哀涕洟遠切諸  
孤之痛難追世父之慈有生必化從古同轍元酒清滌  
用申永訣寄懷斯文於彼臨穴

祭故房州崔使君文

維貞元十七年歲次辛巳十一月己未朔十月戊辰姪  
女婿朝議郎守中書舍人賜緋魚袋權某謹以清酌庶  
羞之奠敬祭於故房州崔十一叔之靈荆藍之下必產  
貞玉有斐君子生於茂族信以發志居惟慎獨時然後

言言必可復昔未弱冠敏然清規已結黃綬分曹帝畿  
亦宰一同邑人熙熙有翹者車辟禮交馳乃罄神羊在  
壽之陽俄佩赤綬贊於熊相尋副戎車再遷直指守臣  
進律公亦戾止著作中秘古之外史章奏文昌虞衡允  
理吏二千石風化攸興朱轡赤帷來惠房陵饋軍禦寇  
徵令重仍恭敬不謬秉持有恒六年刺舉千里清澄亢  
此下人時公之能昔惟觀止條焉二紀道信節以交觀  
寓揚都而晏喜袞袞清義怡怡致美亦旣納徵願言未  
幾悼子咸以作賦感東武而成誄繫援凋落惟公是已  
方歎分符又悲閉水昔年委質於汴之東從事則異嘉

招實同項忝右掖獲辭南宮或方駕於辨色或開襟於  
退公華燭以燻芳罇不同乍詠庭中之雪每歡林下之  
風千騎雖遠雙魚屢通永懷休沐若去池籠顧此室內  
二年沉痾方書藥石織悉誠誨精微析理欸曲深愛迎  
門發函俯仰是佩幸積恙之小問莫異時之良會如何  
奄忽永謝昭代哀以慈結情逾禮外對茲悽酸心骨如  
碎中饋仁賢諸孤嶄然充窮卽遠誠信歸全萬事如昨  
音容冥冥薤晞朝露舟失夜壑鮮原喬木遵彼東洛若  
堂若坊先子所託目想如在心懷可作神其格思歆此  
單酌尚饗

祭楊校書文

維貞元二十年歲次景寅

云云

故校書楊君幼樞之靈

大玉天球不磨不斲清廟黃目森然禮容先正司徒德  
與位崇恬然清靜以厚時風幼樞嗣之天授全識日新  
不殆能世其德亦既弱冠聲猶四塞瓊樹一枝鳳姿五  
色登名太常芸閣爲郎首大府之嘉命專中軍之奏章  
目成清冥足跋康莊期元成於必復知公業之不亡猥  
以蒙瑣辱當親姬嘉禮用時歡言卜夜追惟世好交契  
逾深自爲聲譽豈止潘任日聞清機酒我煩襟彼松茂  
以蘭臭諒二人之同心常謂子曰居中用晦明道若昧

姑務其實姑脩其內名浮於行所以賈害直諒之詞迭承  
規誨清和之月邗溝分袂間茲一水使我心海曠懷勝  
理緘封相繼不聞移疾奄此下世泣讀訃書百骸如碎  
寢門一痛素車來會觀聽未移音容如對如何返真邇  
此短辰書有遺草弔無雜賓塗芻在御嘉偶方姪護喪  
晝哭反葬咸秦驗熊羆之吉兆償世祀之悠久儼書籍  
以具存傳義方於身後嗚呼哀哉或仁而夭或鄙而壽  
彼蒼者何難以理究顏生短命叔寶多病奈何賢達古  
今不幸大鈞茫茫死生其常痛我幼樞二紀而亡嚴霜  
夏隕零落貞芳嚮用五福何人則當寫懷寄誠在此一

觴哀從中來雪涕浪浪尚饗

祭楊校書夫人文

維元和三年歲次戊子三月癸未朔二十五日丁未妹  
壻大中大夫守尚書兵部侍郎上柱國襄武縣開國侯  
權某 云云 故校書郎楊君夫人一姊之靈先姊先舅公

台積厚德門交輝士女挺秀有儀有耀宜貴宜壽纔移  
所天俄哭於晝遠護帷裳來歸帝鄉洒滯壤樹潔蓋蒸  
嘗之死之誓炯然秋霜二十年間形同未亡乃育孤女  
是歸良匹亦既有行秀而不實感念難遣哀酸成疾晦  
明推移變化奄忽昔與幼樞姻聯揚都歲時二紀人事



萬殊諒勞生於此世何怛化之同途彼福善與貽慶又  
不知夫神理之有無顧我好仇永懷伊姊動若形影痛  
深骨髓芻靈就列迷真停軌觴酒寫哀神其聽此尚饗

祭崔士曹文

維元和八年歲次癸巳二月朔日禮部尚書權某

云云

故京兆府士曹崔君之靈嗚呼相門令嗣被服大義青  
襟隸業黑衣人侍贊佐征師參榮臺寺職列京掾年纔  
強仕謂登公朝稍進名器層雲未翥迅翼俄墜惟先穆  
公左官江干一言營道二姓交歡信郡邁止君初卅角  
揚都會合甫過幼學自至京轂相傳傳約永言舊知敢

忘先託常曰繫援內惟菲薄缺然深哀猶負前諾力命  
乖戾英華銷鑠方馳康莊已歎冥冥長女未笄幼男孩  
提披披靈衣嗷嗷孀妻緜原大墓祖載東附瞻言體魄  
歸此壤樹顧我室人沉痾積年四支半廢雙足不前常  
痛終鮮况茲歸全氣息纔屬形神憊然哭不爲位哀不  
成禮卧牀宛轉如刀集體祔轉曉發銘旌前啟魂無不  
之歆此牢醴尚饗

祭唐評事文

維貞元二十年歲次甲申十一月壬戌十六日丁亥禮  
部侍郎權某

云云

故大理評事唐君之靈昔與之子江

湖觀止伯仲怡怡含章致美麗則拔俗清言會理策名  
東堂交辟知己始賓岐陽爰佐景通四名安卑虛懷蹈  
中朝多薦延方俟至公才則有裕命胡不融自展嘉姻  
纔逾半歲索居大半書札相繼北自郵時南遵白帝巴  
峽沂泝風波迢遞反駕京轂遄嬰病癘旬朔之間奄然  
下世自古哲賢或非大年吁嗟嘉言今亦已焉噉噉孤  
嗣窮訴彼天舊篋遺草深交絕絃室有才叔含酸晝哭  
靈輜就路遺帛在腹與協熊羆次昌嗣續波崩塗潦悽  
悽風燭顧女弟以增欷想斯人之不復白馬素車寒原  
夏屋奠燭雪涕逆此瞑目尚饗

告王考禮部府君文

維元和十二年歲次丁酉七月戊子朔十五日壬寅孤  
孫山南西道節度管內支度營田觀察處置等使銀青  
光祿大夫檢校吏部尚書興元尹御史大夫扶風郡開  
國公食邑二千戶某敢昭告於王考贈尚書禮部郎中  
府君伏惟尊行令德不丁於時義方教忠貽厥延耀今  
王妣靈轉至自澤國龜筮叶吉啟祔有期聖慈孝理贈  
典褒賁敢用遠日祇焚命書禳服徽數加大夫之飾官  
守拘限不獲躬親謹遣男監察御史裏行璩以柔毛剛  
鬣嘉薦醴齊將命襄事伏惟尊靈降格

告王妣楊氏文

維云云 敢昭告於王妣夫人宏農楊氏伏惟坤順協德  
闔門流慶昔歲違難假葬南方今龜策告猷歸附伊洛  
先遠將及恩禮特加王考府君有褒錫之命限以守在  
方任兼領戎師不獲榮獲道途躬奉窀穸殘生孤苦萬  
感在心謹遣男璩以柔毛剛鬣嘉薦醴齊展禮伏惟尊  
靈降格

告先公貞孝公文

維云云 敢昭告於考贈太子太保貞孝公妣贈絳郡太  
夫人隴西李氏追惟亂歲奄失嚴訓迨至立年再鍾茶

夔零丁孤藐苟未滅身自幼逢聖明獲備將相祇循教  
義摧割肝心伏以潤州壤樹久已安宅但地遠江介心  
焉匪寧遷神反祔永懷怵惕伊水之陽喬木斯在伏以  
二尊棄代年紀寢遠四承追命再受封疆禮官易名考  
功奏議今因祖載備舉徽章王考府君恩加贈典申下  
養之義遂罔極之誠孤蒙無似觸緒崩裂受命守土有  
闕躬親謹遣男璩以柔毛剛鬣嘉薦醴齊將事祇薦伏  
惟尊靈降鑒永寧厚載

祭子壻獨孤少監文

維元和十年歲次乙未四月壬寅朔六日丁未外舅太

常卿權某敬以清酌時羞之奠致祭於故祕書少監贈  
絳州刺史獨孤即之靈噫嘻大鈞生死沍沍壽夭紛綸  
古人罕言豈造化流形不與其全或一氣滑滑偶然而  
然嗟我子壻時之令德自誠而明必協於極前殿大對  
諫垣正色中臺有聲東觀以直訓辭溫雅視草宥密當  
時之選必居第一玉立噉然古之淵騫抗詞犯顏勇若  
諸賁立不易方卽之也溫道乃前定實安於仁時爲憲  
公先友是敦旣以聲子之舊復茲戴侯之親歡言展止  
十五年矣始遇弱冠今纔強仕會朝方駕居室同里愛  
我以德忠言在耳勞績盡瘁疾嬰膝理乞身上言移亞

外史謝絕人寰屏居鄆田異此宴闈百疴就痊神理曖  
昧晦明纏綿勿藥難徵駮車言旋吁嗟風燭糾纏倚伏  
涉路猶理入門而復親賓怛化里閨行哭如何斯人奄  
忽不淑物情所望必至宰匠惟君知臣注意寅亮如因  
劇切然後交鬯動於險中終不委上徹瑟之辰萬情百  
身孤孀噉號所不忍聞念以蒙稚孝思天至禮逾成人  
哀感異類昔謂福善今疑報施臧孫有後惟此可與翻  
翻素旌東指鼎成鮮原夜壑密印芻靈總衰已除服紀  
太輕如何此禮不稱予情薤歌楚挽一往不返哲兒襄  
事茹痛終鮮送爾冥冥顧予衰寒悲哀所鍾賢達未免



萬形必化何早何晚雖以懷終不能自遣淚盡彌苦魂  
交可展奠茲一觴臨訣先遠尚饗

祭孫男法延師文

維元和十二年歲次丁酉五月庚申朔十三日壬申翁  
翁婆婆以乳菓之奠致祭於九歲孫男法延師之靈爾  
之敏悟爾之孝愛纔至亂齒已能知書倦息猶在於文  
字嬉遊不離於硯席其姿狀有外祖河南之風懿茲風  
成必謂致遠疾瘍所遭醫禱無瘳竟罹天枉痛切心骨  
况自二歲三哭殤孫逝者日遠存者無幾吾以哀年多  
病支體不隨爾父在京不見其絕痛爾櫛櫛歸遵畏塗

今日哀懷尤倍常理頃者求拔苦海依歸度門故於歛襲率以緇褐今之祖奠靡設羶腥苦痛之深遣割不去臨路長痛嗚呼奈何

祭外孫女文

維元和十二年歲次丁酉六月己未朔十二日庚午外翁婆以情酌庶羞之奠致祭於獨孤氏孫女妹妹之靈吾殘生衰苦殃禍相循四年已來七遭傷悼今日之痛情又倍常以前年再丁齊斬意其孤苦備極或保安全神理謂何又茲天闕自嬰羸恙雖未痊除而神用精明不減平日昨以晦朔歸奉几筵信宿之間幽明已隔群

告倘恍如狂如癡呼天不聞此痛何極况今冬除禪來  
歲初筭方擇良對以圖先近豈吾之薄佑有忤神明復  
爾之稟命不可踰越理遣不去情鍾奈何吾家壞樹宛  
在伊洛今爾體魄歸附壽安吾多病蕭然義期可見生  
也死也如環斯循倘冥冥有知與爾為泉壤鄉黨滯  
酒申訣嗚呼痛深尚饗

權載之文集卷五十

補刻

陸贄翰苑集序

嘗讀賈誼書觀其經制人文鋪陳帝業術亦至矣待之  
宣室恨得後時遇亦深矣然竟不能達四聰而盡其善  
排羣議而試厥謀道之難行亦已久矣東陽絳灌何代  
無之嘻一薰一蕕善齊不能同其器方鑿圓柄良工無  
以措巧心所以理世少而亂日多大雅衰而正聲寢漢  
道未融既失之於賈傅吾唐不幸復擯棄於陸公公諱  
贄字敬輿吳郡蘇人溧陽令侃之子年十八登進士第  
應博學宏辭科授鄭縣尉非其好也省母歸壽春刺史

張鎰有名於時一獲晤言大加賞識暨別鎰以泉貨數萬爲賚曰願以此奉太夫人一日之膳公悉辭之領新茶一串而已是歲以書判拔萃調渭南簿<sub>講</sub>御史府以監察換之德宗皇帝春宮時知名召對翰林卽日爲學士由祠部員外轉考功郎中朱泚之亂從幸奉天時車駕播遷詔書旁午公灑翰卽成不復起草初若不經思慮及成而奏無不曲盡事情中於機會倉卒填委同職者無不拱手歎伏不能復有所助嘗從容奏曰此時詔書陛下宜痛自引過以感人心昔禹湯以罪已勃興楚昭以善言復國陛下誠能不悛改過以言謝天下俾臣

草辭無諱庶幾羣盜革心上從之故行在詔書始下雖  
武人悍卒無不揮涕激發議者以德宗克平寇亂不惟  
神武之功爪牙宣力蓋亦資文德腹心之助焉及還京  
師李抱真來朝奏曰陛下在山南時山東士卒聞書詔  
之辭無不感泣思奮臣節臣知賊不足平也公自行在  
帶本職拜諫議大夫中書舍人精敏小心未嘗有過艱  
難扈從行在輒隨啟沃謀猷特所親信有時讜語不以  
公卿指名但呼陸九而已初幸梁洋棧道危狹從官前  
後相失上夜次山館召公不至泣然號於禁旅曰得陸  
費者賞千金頃之公至太子親王皆賀初公旣職內署

母韋氏尙在吳中上遣中使迎致京師道路置驛文士  
榮之丁韋夫人憂去職持喪於洛遣人護溧陽之柩附  
葬河南上遣中使監護其事四方賻遺數百萬公一無  
所取素與蜀帥韋南康布衣友善韋令每月置遺公奏  
而受之服闋復內職權知兵部侍郎覲見之日天子爲  
之興改容敘弔優禮如此內外屬望旦夕俟其輔政爲  
竇參忌嫉故緩之真拜兵部侍郎知貢舉得人之盛公  
議稱之貞元八年拜中書侍郎平章事公以少年入侍  
內殿特蒙知遇不可與眾浮沉苟且自愛事有不可必  
諍之上察物太精躬臨庶政失其大體動與公違姦諛

從而間之屢至不悅親友或規之公曰吾上不負天子  
下不負吾所學不恤其他公精於吏事斟酌剖決不爽  
錙銖其經綸制度具在德宗實錄及寶參納劉士寧之  
賂爲李異所發得罪左遷橫議者以公與參素不協歸  
罷相之議於公戶部侍郎判度支裴延齡以姦回得幸  
害時蠹政物議莫敢指言公獨以身當之屢言不可翰  
林學士吳通元忌公先達每切中傷陰結延齡互言公  
短宰相趙憬公之引拔升爲同列以公排邪守正心復  
異之羣邪沮謀直道不勝十年退公爲賓客罷政事明  
年夏旱芻糧不給軍校訴於上延齡奏曰此皆陸贄輩



怨望鼓扇軍人也貶公忠州別駕上怒不可測賴陽城  
張萬福救之獲免蜀帥韋令抗表請以贄代已歲賂資  
糧公在南賓閉門却掃郡人稀識其面復避謗不著書  
惟考校醫方撰集驗方五十卷行於世江峽十稔永貞  
初與鄭餘慶陽城同徵還公已薨歿時年五十二公之  
秉筆內署也推古揚今雄文藻思敷之爲文誥伸之爲  
典謨俾獮豸向風懦夫增氣則有制誥集一十卷覽公  
之作則知公之爲文也潤色之餘論思獻納軍國利害  
巨細必陳則有奏草七卷覽公之奏則知公之爲臣也  
其在相位也推賢與能舉直措枉將幹璿衡而揭日月

清氛沴而平泰階敷其道也與伊說爭衡考其文也與  
典謨接軫則有中書奏議七卷覽公之奏議則知公之  
事君也古人以士之遇也其要有四焉才位時命也仲  
尼有才而無位其道不行賈生有時而無命終於一慟  
惟公才不謂不長位不謂不達逢時而不盡其道非命  
歟裴氏之子焉能使公不遇哉說者又以房魏姚宋逢  
時遇主克致清平陸君亦獲幸時君而不能與房魏爭  
列蓋道未至也應之曰道雖在我宏之在人蜚蝗竟天  
農稷不能善稼奔車覆轍孔孟亦廢規行若使四君與  
公易時而相則一否一臧未可知也而致君不及貞觀

開元者蓋時不幸也豈公不幸哉以爲其道未至不亦  
誣乎公之文集有詩文賦集表狀爲別集十五卷其關  
於時政昭昭然與金石不朽者惟制誥奏議乎雖已流  
行多謬編次今以類相從冠于編首兼略書其官氏景  
行以爲序引俾後之君子覽公制作效之爲文爲臣事  
君之道不其偉歟

左武衛胄曹許君集序

建安之後詩教日寢重以齊梁之間君臣相化牽於景  
物理不勝詞開元天寶以來稍革頽靡存乎風興然趨  
時逐進此爲橐籥紳佩之徒以不能言爲恥至於吟詠

性情取適章句者鮮焉有許氏子者名經邦字某世得命官不書於此如舉其始終之略以著於篇君天授純靜不遷於物修檢之中須有夷曠早孤家於鄱陽有佳山水遂以貞遜爲心不近聲利孝敬溫信著於州里保閒樂退無所撓屈家人近習未嘗見其喜愠之色謀學業文以此爲適相國第五公之爲郡也軾聞懸榻以禮之咨於連帥薦授試左武衛曹參軍有別野去家百里秋八月溯溪而上灘極險不幸溺於秋濤之中嗚呼踐儒行而未申其用霑初命而未至於祿受全氣而不終其壽此三者所以爲士友之病凡所賦詩皆意與境會

疏導情性含寫飛動得之於靜故所趣皆遠其道退其  
徒寡不交當世故知之者希惟昌黎韓愈泰山羊潛最  
爲友善羊旣物化韓爲江西從事今年余役於鍾陵而  
君去世之三歲也文行實錄皆得之於韓噫嘻士之修  
道向晦不耀於時以泯沒者可勝道哉如許君者潔身  
於困約之中講義於蓬茨之下以六藝之文爲富以一  
畝之宮爲泰齊人吹竽楚人泣玉故志業內固一未  
發介然居易以至歿身其古之牆東谷口之徒歟韓以  
其詩三百篇授予故類而爲集

韋賓客宅宴集詩序

太子賓客韋君影華纓佩金龜爲清時大僚有數年矣  
始以博士奉朝請周厯臺閣出身藩符入作卿長乃領  
內府又賓東朝拜章乞告優詔得請致仕就第燕閒自  
頤中外族屬嘗僚貴仕以觴酒祝延發禮修賀者多矣  
以兄始登朝行實自禮寺蕃祉吉祿此爲椎輪於是眾  
君子學通行修嘗踐此任者與今之引經據古屈職在  
列者同聲撰日復修茲會乃有夏官小司馬左右曹侍  
臣書殿東觀柱下史南宮郎九旋十疑而鄙夫忝焉入  
門而右勝概迎步聳一檻於賓位羅松篁於石徑清冬  
之時寒翠溢目則熙春眾卉韶灼駘蕩又可知也軒蓋

上下壺觴交錯聆主人之言則同惇史聽眾賓之論如  
在曲臺徜徉乎禮文博約乎法義樂在名教慶茲壽寵  
中飲霑醉抗音擊節乃相謂曰季倫金谷實有歌詩元  
亮斜川亦疏爵里況今賀得謝之美賦必類之詞愛景  
美祿遺簪投轄盛集之若是者有幾安可沒而不書猥  
微菲薄以附官業今裴辛呂三君子皆講學稱職而司  
勳滿歲復留再帖郎位猶四命焉前此者柱史之超拜  
浹日矣鄙夫之忝茲一紀矣二左曹東觀十二年矣原注

陳君二十年馮君二十年張君十八年今云二十年開中半也

小司馬向三十年矣而

主人逾四十年矣其於折中定議損益於儀法多矣

原注

兵部二十八年主人四  
十五年向逾舉全數也  
外有平陽長樂二連帥  
韋君柳  
君絳柳和三郡守裴君  
李君  
前蘇州韋君信州陸  
君  
守之介劉君六邑之  
長姜君合中外歷是者  
十九  
人因廣斯文且爲禮官  
之籍